

Mak ndê ηawaê ηayham Yom whê ηawaê ηayham dindec sa-ηga

Mak in Yisu ndê ηgacsêηomi 12 si dan dom, magoc in tiatu yêc Jerusalem ma gêlic gêη hon nan Yisu kôm têtη ndoc dinaη. Tinambu Mak kêsêlêη whiη Pita têtη ndoc Pita gêm mêtê, ma to ηawaê ηayham pi Yisu kékuc mêtê nan Pita gêm. Lau ηatô gauc gêm bu yom nan Mak to yêc 14:51-52 nan hêganôη in dau. Tinambu in gêm Pol lu Banabas sa tu inlu si gwelen-ηga. Alic yom ηatô pi in yêc Apo 12:12, 25; 13:5, 13; 15:36-39, ma yêc Kol 4:10 ma 2 Tim 4:11.

Mak to yom daêsam pi gwelen nan Yisu kôm, magoc yom daêsam nan Yisu sôm tu bu êndôhôn lau-ηga, nan in to dom.

*Jon kêmasaη Yisu ndê sen
(Mat 3:1-12; Luk 3:2-16)*

¹ Yom dindec gic hu ηawaê ηayham pi Anötö ndê Atu Yisu Kilisi.

² Mun-ηga, propet dan to yom nan Anötö sôm têtη in ndê Atu bocdec bu:

Aö wakêη aneη ηgac aheη-ηga mun am. In oc
êmasaη am nem sen. *[Mal 3:1]*

Ma propet Aisaya to Anötö ndê yom pi ηgac aheη-ηga dau bocdec bu:

³ N̄amalac daŋ ta yom mbo gameŋ sawa bocdec bu, ‘Amasaŋ Pômdau ndê seŋ tisolop. Amasaŋ nem ŋalôm bu akôc iŋ sa.’ *[Ais 40:3]*

⁴ Yom dau ŋandô sa pi Jon, Ngac Kêku Lau-ŋga, naŋ tiŋambu hôc asê ma gêm mêtê mbo gameŋ sawa. Iŋ sôm têŋ lau bu sêliŋ saŋgu tu bu sêtôc asê bu sêkac si ŋalôm kwi ma sêhu mêtê sac siŋ, dec Anötô oc suc ŋac si sac kwi.

⁵ Lau daêsam akêŋ malac Jerusalem, ma akêŋ malac hoŋ yêc gameŋ Judia-ŋga, sêsa sêtêŋ Jon si. N̄ac sêhoc si sac asê, ma iŋ kêku ŋac yêc Bu Jordan.

⁶ Jon sôc ŋakwê naŋ sêmasaŋ ŋa kamel ŋamlichu, ma kic piŋkap yêc iŋ ŋampêbalê. Ma iŋ gêŋ gêŋ bambaliŋ gitôm wakô ma lêp.

⁷ Iŋ gêm mêtê ma sôm têŋ lau bocdec bu, “Ngac daŋ oc meŋ êŋkuc aö, naŋ ndê ŋaclai hôc gêlêc aö neŋ su. Aö ŋgac ŋambwa dec gitôm dom bu wati iŋ ndê ŋgac akiŋ naŋ pôŋ sic ma kêgapwêc iŋ ndê atapa ŋawalô.

⁸ Aö kaku mac ŋa bu ŋambwa, tigeŋ iŋ oc êŋku mac ŋa N̄alau Dabuŋ.”

Jon kêku Yisu

(Mat 3:13-17; Luk 3:21-22; Jon 1:32-34)

⁹ Têŋ têm dinaŋ Yisu meŋ akêŋ malac Nasaret yêc gameŋ Galili-ŋga, ma hôc asê Jon. Ma Jon kêku iŋ yêc Bu Jordan.

¹⁰ Têŋ ndoc Yisu pi akêŋ bu meŋ, iŋ gêlic undambê kac sa, ma N̄alau Dabuŋ gêm balusi aŋgô, ma sip têŋ iŋ meŋ.

¹¹ Goc awha daŋ sa akêŋ undambê, naŋ sôm, “Aö Atuŋgac atac whiŋ-ŋga am. Aö gatisambuc am ŋandô.”

*Sadaŋ kêsahê Yisu
(Mat 4:1-11; Luk 4:1-13)*

¹² Dinaŋ su, goc Njalau wê Yisu sa gameŋ sawa gi, ma iŋ mbo tawasê.

¹³ Tôm bêc 40 iŋ mbo gameŋ sawa, ma Sadaŋ kêsahê bu êntôm iŋ. Iŋ mbo whiŋ bôc gameŋ sawa-ŋga, ma aŋela sem akiŋ iŋ.

Yisu gic hu iŋ ndê gwelen

¹⁴ Tiŋambu †Herod kêkiŋ iŋ ndê lau siŋ-ŋga bu sêkôc Jon dôŋ, ma sêkêŋ iŋ ndôc gapocwalô. Têŋ têm dinaŋ Yisu gêm mêtê ma hoc Anötö ndê ŋawaê ŋayham asê têŋ lau yêc gameŋ Galili-ŋga.

¹⁵ Iŋ sôm, “Têm naŋ Anötö kêyaliŋ sa, naŋ meŋ sa su. †Anötö ndê gôliŋ meŋ kêpiŋ su. Bocdinaŋ anem nem ŋalôm kwi, ma akêŋ whiŋ Anötö ndê ŋawaê ŋayham.”

*Yisu mbwêc laŋgac hale tu sêŋkuc iŋ-ŋga
(Mat 4:18-22; Luk 5:1-11; Jon 1:35-42)*

¹⁶ Têŋ bêc daŋ Yisu kêsêlêŋ mbo Bugictonŋ Galili ŋamakê, ma gêlic Saimon lu asi Andru. Inlu ŋgac lu sêkôc i-ŋga, ma sem gwelenŋ sêkêŋ wasaŋ sip bu sêmbô.

¹⁷ Ma Yisu sôm têŋ inlu, “Amlu amenŋ aŋkuc aô, ma aô wakêŋ amlu ahê ŋamalac sêmeŋ sêŋkuc aô, tôm naŋ kwahic dec amlu ahê i.”

¹⁸ Ma ŋagahô inlu sêtec si wasaŋ yêc, ma sêŋkuc iŋ.

¹⁹ Iŋ kêsêlêŋ ŋasawa sauŋ, ma gêlic Sebedi ndê atu lu, Jems lu Jon. Sêndôc waŋ daŋ ma sêmasaŋ si wasaŋ naŋ kic.

²⁰ Yisu mbwêc injlu bu sêmenj sênkuc inj, goc sêhu damba Sebedi ti lau nanj sêkôm gwelenj sêwhinj inj, nanj sinj sêmbowanj, ma sênkuc Yisu.

Yisu kêdôhônj lau ma soc njalau sac yêc malac Kapenaom
(Luk 4:31-37)

²¹ Yisu kôc lau hale dinanj ma sênsêlênj sêtênj malac Kapenaom si. Sêhóc asê tênj bêc Sabat-njga danj, ma Yisu sôc †lôm wê-njga gi, ma gic hu kêdôhônj lau.

²² Ma lau Kapenaom-njga sêhêdaê tu inj ndê yom-njga, bu inj kêdôhônj njac gitôm kêdôhônjwaga ti njac lai atu, hóc gêlêc lau Israel si †kêdôhônjwaga yomsu-njga honj su.

²³ Njgac danj ndöc lôm wê-njga dinanj, nanj njalau sac mbo inj ndê njalôm. Inj ta yom bocdec bu,

²⁴ “Ei! Yisu Nasaret-njga. Aô kayalê am, am njgac dabunj nanj Anötö kêkinj. Am bu kôm sake tênj yac? Am mwenj bu senj yac su, a?”

²⁵ Magoc Yisu hec yom njalau sac ma sôm, “Am mamananj ma hu inj sinj!”

²⁶ Goc njalau sac kêmwananj njgac dau ti njanjanj ma hu inj sinj ti mbwêc atu.

²⁷ Tu dinanj-njga lau honj sêhêdaê ma sêndac dandi, “Gênj bocke dec? Inj kêdôhônj yac nj lênj wakuc ma ti njac lai atu. Ma inj kôc njac lai pi njalau sac whinj, bu inj kênj yatu njac, ma sêsoc inj ndê yom njapu.”

²⁸ Ma tinjambu lau sic minj yom pi gênj dau, e njagahô enj inj ndê waê gêm gamenj Galili-njga honj ahuc.

*Yisu gêm lau gêmbac daêsam sa
(Mat 8:14-17; Luk 4:38-43)*

²⁹ Njac sêhu lôm wê-nga dinaŋ siŋ, ma Saimon lu Andru sêkôc Yisu, Jems ma Jon ma sêtêŋ inlu si andu si.

³⁰ Saimon ndê lawawê gêmbac lic ñandê ma yêc andu dau ñalôm, ma lau sêkêŋ ñawaê têŋ Yisu.

³¹ Bocdinaŋ Yisu têŋ in gi, kêŋ in sip amba ma keŋ in sa. Ma gêmbac hu awê dau siŋ, ma in gêm akiŋ ñac.

³² Têŋ telha dinaŋ têŋ ndoc ac gi sip, naŋ lau malac-nga sêhoŋ lau gêmbac daêsam ti lau naŋ ñalau sac sêmbo si ñalôm, ma sêkôc ñac sêtêŋ Yisu sêmeŋ.*

³³ Lau malac-nga hoŋ sêkac dau sa, sêmbo andu dau ñamakê.

³⁴ Ma Yisu gêm lau ti gêmbac tidau-tidau daêsam dinaŋ sa, ma soc ñalau sac daêsam su yêc lau. Tigen in kêŋ yao ñalau sac bu sêsôm in asê dom, ñahu bu ñac sêŋyalê bu in †Mesaya dau.

*Yisu hu malac Kapenaom siŋ
(Luk 4:42-44)*

³⁵ Têŋ ñagalaŋsê ac pi meŋ su dom ma Yisu tisa ma hu malac dau siŋ. In sa gi bu mbo tawasê ma teŋ mbec.

³⁶ Saimon ma lau ñatô naŋ sêwhiŋ in, naŋ sêsa si bu sêŋsalê in.

³⁷ Ma têŋ ndoc sêtap in sa, naŋ sêsôm têŋ in bu, “Lau hoŋ sêŋsalê am.”

* **1:32:** Lau Israel si yomsu Sabat-nga gic yao lau bu sêŋsêlêŋ seŋ baliŋ me sêkôm gwelen têŋ bêc Sabat-nga dom. Magoc bêc Sabat-nga ña-yao pacndê têŋ ndoc ac gi sip. Tu dinaŋ-nga dec lau sêhôn e ac gi sip su, goc sêkôc si lau gêmbac sêtêŋ Yisu si.

38 Magoc Yisu ô yom ma sôm, “Aö oc wambo malac tigen dinan dom. Dalhö datên malac nan sêyêc gameñ namakê-nga dandi, bu wanem mêtê wambo dinan. Tu gwelen dinan-nga dec aö gameñ.”

39 Ma tinambu in kêsêlên golom-golom malac hon yêc gameñ Galili-nga. In gêm mêtê mbo lau si lôm wê-nga, ma soc ñalau sac daêsam su yêc lau.

*Yisu kôm ñgac ti gêmbac leprasi ñayham sa
(Mat 8:1-4; Luk 5:12-16)*

40 Têñ bêc dan, ñgac ti gêmbac ñleprasi dan têt Yisu gi. In pôn haduc ma ten Yisu bu nem in sa. In sôm, “Am bu tac whin, dec gitôm bu am oc kôm aö ñamlic ñawasi sa.”

41 Yisu tawalô in, dec kêmatôc amba sa gi ma kêmasêc in, ma sôm, “Aö atac whin, dec wasôm têt am bu ñamlic ñawasi sa.”

42 Ma ñagahô eñ gêmbac dau hu in sin, ma in ndê ñamlic ñawasi sa.

43-44 Goc Yisu kêkin in têt ñdabuñ-siga gi, ma sôm ti ñanğa têt in, “Am ñgô! Gêñ nan kwahic dec hôc asê am, nan sôm asê têt lau dan dom. Tigen têt dabuñsiga ndi, ma tôc daôm têt in bu lic bu am nem ñamlic ñawasi sa su. Ma kêñ da tu am ñamlic ñawasi sa-nga tôm yomsu nan Moses kêñ têt yac. Ma ñalên dinan lau hon oc sênyalê bu am ñamlic ñayham sa.”

45 Ma ñgac dau sa gi ma gic min pi gêt dau e yom dau tiapa. Tu dinan-nga lau hon takwê Yisu, dec in tec bu sôc malac dan yêc lhu. In mbo gameñ namakê-nga, magoc lau akêt gameñ hon sêwê sêtên in si ñapan.

2

*Yisu kôm ngac bôlinj danj nayham sa
(Mat 9:1-8; Luk 5:18-26)*

¹ Bêc natô ginjga su, goc Yisu sôc malac Kape-naom tiyham. Ma lau malac-nga sêngô jawae bu inj mbu meñ ndöc andu danj.

² Goc lau daêsam sêkac dau sa, ma Yisu gêm mêtê ngac. Lau daêsam andô sêkac sa e ñasawa mba yêc andu ñalôm ma yêc ñasactô bocdinañ.

³ Ma launğac hale sêmbalanj ngac bôlinj danj yêc sac danj sêmeñ, ma bu sêtêñ Yisu sêndi.

⁴ Magoc lau daêsam dinañ sem gamen ahuc, ma tu dinañ-nga dec ñac sêpi andu ñapoc lólôc si, ma sêkac poc sa ma sêmasañ ñalasê danj yêc gamen nanj Yisu kalhac, nanj ñahô-nga. Goc sêñwhañ sac ti ngac bôlinj sip têtñ Yisu gi.

⁵ Yisu gêlic gêtñ dinañ ma kêyalê bu ñac sêkêtñ whin inj, goc sôm têtñ ngac bôlinj, “Anen balê, kwahic dec aö wasuc am nem sac kwi.”

⁶ Têtñ ndoc dinañ kêdôhônjwaga yomsu-nga natô sêndöc andu dau. Sêngô Yisu ndê yom dau, ma gauc gêm yêc ñac si ñalôm,

⁷ “Anötö tigenj gitôm bu suc sac kwi. Ma bocke ngac dindê sôm yom kainj dinañ? Inj ndê yom sac sambuc.”

⁸ Yisu kêyalê ñagahô bu ñac gauc gêm yom bocdinañ, dec inj sôm têtñ ñac, “Tu sake-nga mac gauc gêm yom bocdinañ?”

⁹ Mac akêtñ whin dom bu anen ñaclai yêc bu wasôm têtñ ngac bôlinj dindêc bu wasuc inj ndê sac kwi. Bocdinañ aö wasôm têtñ inj, ‘Tisa, kôc nem mbô sa ma êmsêlêtñ.’

10 Ma têtj têtj mac alic aneŋ yom dau ŋandô sa, dec anjalê bu Anötö kêtj ŋaclai têtj †Ŋamalac ndê Atu yêc nom, bu suc ŋamalac si sac kwi whiŋ.” Goc Yisu sôm têtj ŋac bôliŋ,

11 “Aö wasôm têtj am bu tisa, kôc nem mbô sa, ma lhö têtj nem andu ndi.”

12 Ma ŋac dau tisa yêc lau hoŋ aŋgô-ŋga, kôc ndê mbô sa ma kölhö gi. Gêŋ dau kôm lau hoŋ sêhêdaê ŋandô. Sêmpinŋ Anötö ma sêsôm, “Gêŋ kaiŋ dindec, yac alic daŋ su dom.”

*Yisu kêgalêm Liwai bu êŋkuc in
(Mat 9:9-13; Luk 5:27-32)*

13 Tiŋambu Yisu sa gi mbo bugictonŋ ŋamakê tiyham. Lau daêsam sêsa si sêŋkuc in, ma in kêdôhônŋ ŋac.

14 Ma tiŋambu in kêsêlêŋ gi e gêlic †Liwai, Alpayas ndê atuŋgac ndöc ndê mala kôc takis-ŋga. Goc Yisu sôm têtj in, “Êmkuc aö.” Ma Liwai tisa ma kêkuc in.

15 Têtj bêc daŋ Yisu ti in ndê ŋgacsêŋjomi seŋ gêŋ sêndöc Liwai ndê andu. Ma lau sêkôc takis-ŋga ma lau daêsam naŋ lau bata Israel-ŋga sêsam bu lau sac naŋ sêndöc sêwhiŋ ŋac, bu lau kaiŋ dinaŋ sêŋkuc Yisu tôm bêc hoŋ.

16 Ma lau †Palêsai si kêdôhônŋwaga yomsu-ŋga ŋatô sêlic bu Yisu gêŋ gêŋ ndöc whiŋ lau takis-ŋga ti lau sac dinaŋ. Goc sêsôm têtj in ndê ŋgac-sêŋjomi, “Tu sake-ŋga in gêŋ gêŋ whiŋ lau takis-ŋga ti lau sac?”

17 Yisu ŋgô yom dau, ma sôm têtj ŋac, “Lau naŋ sêlic dau bu gêmbac mba, naŋ oc sêŋsalê dokta dom, magoc lau ti gêmbac oc sêŋsalê dokta. Aö gamenŋ

bu wanğalêm lau nanj sêlic dau bu lau gitên, nanj sa dom, aõ gamen bu wanğalêm lau sac sa.”

Yao gêñ danen-nga-nga
(*Mat 9:14-15; Luk 5:33-35*)

¹⁸ Jon, Ngac Kêku Lau-nga ndê †sêñomi ti lau Palêsai sêkên bêc ñatô bu sênen gêñ dom tu gauc nem Anötö-nga, magoc Yisu ndê ñgacsêñomi sêkôm dom. Ma lau ñatô sêmen ma sêndac Yisu bocdec bu, “Tu sake-nga Jon ndê sêñomi ma lau Palêsai si sêñomi sêhu gêñ danen-nga sinj tu gauc nem Anötö-nga, magoc am nem ñgacsêñomi sêkôm dom?”

¹⁹ Goc Yisu sôm têtñ ñac, “Ngac nem awêhê-nga danj bu êngalêm lau sa sêmbo sêwhin in bu sênen mwasin nem awêhê-nga, dec oc tøm dom bu sêhu gêñ danen-nga sinj têtñ ndoc ñgac dau mbo whin ñac. Nalên tigen kwahic dec aõ gambo gawhin anen ñgacsêñomi ma oc tøm dom bu sêhu gêñ danen-nga sinj.

²⁰ Tigen ndoc oc men nanj lau oc sêkôc aõ su yêc ñac, ma têtñ ndoc dinan ñac oc ñalôm ñawapac, ma sêñkuc lêtñ dahu gêñ danen-nga sinj-nga.”

Yisu ndê yom gitôm gêñ wakuc
(*Mat 9:16-17; Luk 5:36-39*)

²¹ Ma Yisu sôm, “Yac dasi po wakuc pi ñakwê akwa nanj kic, nanj dom. Bu po wakuc oc hóc ñakwê akwa kic, ma gêñ dau oc tisac sambuc.

²² Ma têtñ ndoc lau s êmasan wain wakuc, nanj sêkêc sip bôc ñamlic wain-nga akwa dom. Mba! Nac bu sêkôm, goc wain wakuc oc hóc ñamlic akwa kôc ma wê sa ninğa. Ma bôc ñamlic oc tisac bocdinan. Wain wakuc dakêc sip bôc ñamlic wakuc.”

Yisu in Pômdau bêc Sabat-nga
(*Mat 12:1-8; Luk 6:1-5*)

²³ Têñ bêc Sabat-nga dan Yisu ti ndê tñgacsêñomi sêñsêlêñ sêmbo lôcwha dan nan gic ôm wit-nga dan kic. Ma in ndê ñgacsêñomi sêkôc wit ñandô ñatô bu sêneñ.

²⁴ Ma lau Palêsai ñatô sêlic gêñ dau ma sêsôm têñ in, “Lic gêñ nan am nem ñgacsêñomi sêkôm. Tu sake-nga ñac sêkôm gwelen nan yac neñ yomsu gic yao bu dakôm têñ bêc Sabat-nga dom?”

²⁵⁻²⁶ Yisu ô ñac si yom ma sôm, “Gauc nem yom nan sêto pi gêñ nan Kiñ Dawid kôm. Mac asam su, me? Têñ ndoc nan Abiata in tñdabuñsiga ñamata-nga, nan Dawid ti lau nan sêwhin in, nan sêpônda dau ma gêñ yô ñac. Goc Dawid sôc Anötö ndê andu gi, ma gêñ bolom dabuñ nan lau sêkêñ ti da, nan Moses kêñ yao bu lau dabuñsiga tawasê oc sêneñ. Ma in kêñ têñ lau nan sêmbo sêwhin in, ma ñac señ. Magoc lau dan sêñgôlin yom pi Dawid ma sêsôm bu in kêgili yomsu lec dom.”

²⁷ Ma Yisu gic têku yom ma sôm, “Bocdinañ akôc gauc ñapep pi yomsu. Anötö kêñ bêc Sabat-nga bu nem ñamalac sa. In kêñ ñamalac tu bêc Sabat-nga dom.

²⁸ Ñamalac ndê Atu in gêñ hon ñadau, ma in Pômdau Sabat-nga whin.”

3

Yisu kôm ñgac amba balê ñayham sa têñ bêc Sabat-nga

(*Mat 12:9-14; Luk 6:6-11*)

¹ Têñ bêc dan tiyham Yisu sôc lôm wê-nga gi. Ma ñgac amba tibalê dan ndöc.

² Palêsai ñatô sêñsalê yom bu sêñgôliñ pi Yisu, dec sêtip in ñapep bu mboe in oc kôm ñgac dau ñayham sa têtñ bêc Sabat-ñga, dec ñac oc sêsôm bu in kêgili yomsu Sabat-ñga.

³ Yisu sôm têtñ ñgac nan amba tibalê, “Tisa, ma lhac ñalhu whin aö.”

⁴ Dec in ndac lau hon bocdec bu, “Gêñ bocke oc êngili yomsu Sabat-ñga? Dakôm ñayham têtñ lau, me dakôm sac têtñ lau? Danem ñamalac sa, me datec ñac sêmbac ndu?” Magoc ñac hon sem dôñ.

⁵ In tahê ñac ma tac ñandê sa, ma ñalôm ñawapac tu ñac si ñalôm ñadandi-ñga. Goc in sôm têtñ ñgac dau, “Êmatôc amam.” Ma ñgac dau kêmatôc amba, ma amba dau ñayham sa tiyham.

⁶ Têtñ dinan lau Palêsai sêhu lôm wê-ñga dau sin ma sêsa si. Ma ñac sêndöc sêwhin lau Israel-ñga nan tac whin Herod ma lau Rom-ñga si gôliñ, ma ñac hon sêkôc gauc pi lêtñ sêndic Yisu ndu-ñga.

*Yisu kêdôhôn lau ma kôm gêmbac ñayham sa
(Luk 6:17-19)*

⁷ Yisu ti ndê ñgacsêñomi sêtêtñ bugicton si, ma lau daêsam sêñkuc ñac. Ñac lau akêñ gameñ Galili-ñga ma gameñ Judia-ñga,

⁸ ma akêñ malac Jerusalem ma akêñ gameñ Judia ma Idumia-ñga ma akêñ Bu Jordan ñadanga, ma akêñ malac Taya ma Saidon ñagameñ. Lau daêsam dinan sêñgô ñawaê pi gêtñ nan Yisu kôm, dec sêsa sêtêtñ in si.

⁹ Yisu gêlic lau ton atu nan bu sêñgapiñ in sa, dec sôm têtñ ndê ñgacsêñomi bu sêmasañ wan saun dan tu in pi ndi ndöc-ñga.

10 In sôm yom dinaŋ ɲahu bu in kôm lau gêmbac daêsam ɲayham sa su e lau daêsam ti gêmbac sêkôm mwasac bu sêmasac in.

11 Ma têt ɲdoc lau ti ɲalau sac sêlic in, naŋ sêhu dau sêyêc in aŋgô-ɲga, ma ɲalau dau sêmbwêc yom asê bocdec bu, “Am Anötö ndê Atu.”

12 Tigen Yisu kêt gic yao ɲaŋga bu sêsôm in ɲahu asê dom.

*Yisu kêyalin ɲgacsêŋomi 12 sa
(Mat 10:1-4; Luk 6:12-16)*

13 Tiŋambu Yisu pi lôc daŋ gi ma mbwêc lau naŋ in atac whin, naŋ sêtêt in sêmeŋ.

14 Goc in kêyalin ɲac si lau 12 sa, ma sam ɲac bu †Aposel, bu ɲac oc sêmbô sêwhin in, ma in oc kêt ɲac sêsa sêndi bu sênem mêtê.

15 Ma in kêt ɲaclai têt ɲac bu sêsoc ɲalau sac su.

16 Aposel 12 naŋ Yisu kêyalin ɲac sa, naŋ bocdec: Saimon (naŋ in sam bu Pita),

17 Jems lu Jon (Sebedi ndê atu lu naŋ Yisu sam bu ‘wapap atui’),

18 Andru, Pilip, Batolomeas, Matyu, Tomas, Jems (Alpayas ndê atu), Tadaus, Saimon (naŋ sêsam bu ‘Nɲac †Selot’),

19 ma Judas Iskeriot, ɲac naŋ tiŋambu hoc Yisu asê.

Lau sêŋgihî Yisu ahuc ɲapaŋ

20 Yisu sôc andu daŋ gi, magoc lau toŋ atu sêsap in dôŋ ɲapaŋ e ɲasawa mba bu in ti ndê ɲgac-sêŋomi sêneŋ gêt.

21 Gêt dau ɲawaê tap Yisu dinda ti asii sa, dec ɲac sêsôm, “In ndê gauc tisac.” Bocdinaŋ dec sêtêt in si bu sêkôc in sa ndi.

*Yisu ndê ñaclai ñahu
(Mat 12:22-32; Luk 11:14-22)*

²² Têñ tēm dinañ kédôhônwaga yomsu-nga ñatô sêmenj akêñ Jerusalem ma sêñgôlinj yom pi Yisu bocdec bu, “Ñalau sac si ñadau †Belsebal gêm gôlinj inj, ma kêñ ñaclai têtñ inj bu soc ñalau sac su.”

²³ Goc Yisu mbwêc ñac sêtigasuc inj, ma ô ñac si yom ña yom gôlinj danj bocdec bu, “Bocke ma Sadan oc soc Sadan?

²⁴ Gôlinjwaga danj ndê lau bu sêkêñ kisa dau, dec inj ndê gôlinj oc pacndê.

²⁵ Ma gôlôwac danj bu sêwhê dau kôc, dec oc sêlhac ñanja dom.

²⁶ Ma Sadan bu kêñ kisa têtñ dau ma whê dau kôc, dec inj oc lhac ñanja dom, inj ndê ñaclai oc pacndê.

²⁷ Angô! Sadan inj gitôm ñgac ti licwalô atu, ma yac bu dasôc ñgac ti licwalô atu danj ndê andu bu tanjaho inj ndê gêtñ, nanj gêtñ ñamata-nga dasô inj dôñ, goc tanjaho inj ndê gêtñ.

²⁸ “Yomandô aô wasôm têtñ mac. Ñamalac nanj kac ndê ñalôm kwi ma hu ndê sac siñ, nanj Anötö oc suc inj ndê sac ti yom sac-sac hoñ kwi.

²⁹ Tigenj ñamalac danj bu sôm yom sac pi Ñalau Dabun, nanj Anötö oc suc inj ndê sac kwi dom andô. Inj kôm gêtñ sac sambuc, ma inj ndê giso oc yêc ñapanj.”

³⁰ Yom hoñ dinañ Yisu sôm, ñahu bu ñac sêsôm bu ñalau sac danj mbo inj ñalôm.

*Yisu dinda ti asii
(Mat 12:46-50; Luk 8:19-21)*

³¹ Têñ tēm dinañ Yisu dinda ti ndê asii sêhóc asê andu dau. Sêlhac awê ma sêñkiñ ñamalac danj sôc gi bu kôc in sa sa meñ.

³² Lau daêsam nañ sêndöc sêñgihi Yisu ahuc, nañ sêsôm têt in bu, “Am dinam ti nem asimi dec sêmen sêlhac awê ma sêndac am.”

³³ Goc in ndac ñac, “Aneñ dinañ ti asiñi nañ asa?”

³⁴ Ma in tahê lau nañ sêndöc sêñgihi in ahuc, ma sôm, “Aneñ dinañ ti asiñi dau dindec.

³⁵ Bu lau nañ danja wambu Anötö ndê yom, nañ ñac sêti aö asiñi ti lhuñwêi ma dinañi.”

4

Yom gôliñ pi ñgac kêbalip wit ñawhê (Mat 13:1-12; Luk 8:4-8)

¹ Tiñambu Yisu sa gi mbo bugicton ñamakê, ma gic hu kédôhôn lau tiyham. Ma lau sêwê-sêwê sêmen e ti tonj atu andô. Tu dinañ-nga in pi wan danj gi poc bugicton kêpiñ baö, ma lau daêsam dinañ sêlhac baö.

² Yisu sôm yom gôliñ daêsam bu êndôhôn lau dinañ. In sôm yom gôliñ danj têt ñac bocdec bu,

³ “Anğô! Ngac danj sa gi bu êmbalip wit ñawhê yêc in ndê ôm.

⁴ Têt ndoc in kêbalip gêt dau, nañ ñawhê ñatô sêpenj sêsip senj, ma mbac sêsip sêmenj ma senj su.

⁵ Ma ñawhê ñatô sêpenj sêsip gameñ hoc-hoc, nañ nom ñagec sac hoc ñahô ñambwa. Ñawhê dau sêsip nom ñalôm gacgenj si ñom, dec sêpo sêpi sêmenj ñagahô.

⁶ Tigenj tiñambu ac pec ñagatôm ma gêm bôliñ. Nahu bu nom ñayham mba tu ñawakac sip ndi-nga.

⁷ Ma wit ñawhê ñatô sêpeñ sêsip kwanj ti ñakwa ñalôm, ma kwanj lu wit sêpi sêwhiñ dau e kwanj yanj wit ndu ma gêm ñandô danj dom.

⁸ Ma wit ñawhê ñatô sêpeñ sêsip nom ñayham, ma tiñambu sem ñandô daêsam, ñatô sem ñandô 30, ñatô sem ñandô 60, ma ñatô sem ñandô 100.”

⁹ Goc Yisu sôm, “Asa bu danja-sunj yêc, nanj ñgô aneñ yom.”

*Yisu whê yom gôlinj wit ñawhê-ñga ñahu sa
(Mat 13:10-23; Luk 8:9-15)*

¹⁰ Tiñambu lau daêsam sêmbo dom, ma lau nanj sêmbo sêwhiñ Yisu, ti ñgacsêñomi 12 sêndac Yisu pi yom gôlinj dau ñahu.

¹¹ Ma inj whê sa têtj ñac bocdec bu, “Anötö ndê gôlinj ñalêñ ñahu sip ñalôm gi. Inj kêyalinj mac sa bu anyalê ñahu dau, magoc lau nanj sêmbo Anötö ndê gôlinj ñalôm dom, nanj wasôm yom têtj ñac ña yom gôlinj ñambwa.

¹² Aisaya to yom pi lau kainj dinanj, nanj yêc bocdec bu:

Ñac sêlic gêtj nanj aö gakôm, nanj ñapanj, magoc ñac si gauc sa dom. Ma ñac sêñgô aneñ yom ñapanj, magoc sêñyalê ñahu dom.

Ñac bu sêñyalê, dec oc tôm bu sênem dau kwi, ma Anötö oc suc ñac si sac kwi.” *[Ais 6:9-10]*

¹³ Goc Yisu sôm têtj ñac, “Bocke dec mac anyalê yom gôlinj dinanj ñahu dom? Bocdinanj ñalêñ bocke mac oc anyalê yom gôlinj ñatô ñahu?

¹⁴ Angô! Yom pi ñgac nanj kêbalip wit ñawhê, nanj hêganônj ñgac nanj hoc Anötö ndê yom asê.

¹⁵ Ma yom pi wit ñawhê nanj sêpeñ sêsip senj, nanj hêganônj lau nanj sêñgô Anötö ndê yom, magoc

ɲagahô Sadan meɲ ma kêgaho yom dau su yêc ɲac si ɲalôm.

¹⁶ Ma wit ɲawhê nan sêpeɲ sêsip gameɲ hoc-hoc, nan hêganôɲ lau nan sêngô A nôtö ndê yom ma sêkôc sa ɲagahô ti atac ɲayham.

¹⁷ Tigeɲ tôm wit nan ɲawakac mbasi, nan lau dau sêlhac ɲasawa baliɲ dom. Têɲ ndoc sêtap ɲawapac sa, me lau sêkêɲ kisa ɲac tu Anötö ndê yom-ɲga, nan sêhu si sêkêɲ whiɲ siɲ ɲagahô eɲ.

¹⁸ Ma wit ɲawhê nan sêpeɲ sêsip kwan ti ɲakwa ɲalôm, nan hêganôɲ lau nan sêngô Anötö ndê yom,

¹⁹ tigeɲ sêhêgo dau pi gêɲ nom-ɲga kêlêc, ma lêɲ atac whiɲ mone ti wapa nom-ɲga hê ɲac si gauc ɲapan e kôm Anötö ndê yom ahuc, ma ɲandô mbasi.

²⁰ Ma wit ɲawhê nan sêpeɲ sêsip nom ɲayham, ma sem ɲandô 30, me 60, me 100, nan hêganôɲ lau nan sêngô Anötö ndê yom, sêkôc sa e tidôɲ, ma sem ɲandô daêsam.”

Dasiɲ lam ɲawê kwi dom
(Luk 8:16-18)

²¹ Ma Yisu sôm têɲ ɲac, “Lam iɲ gêɲ pô gameɲ-ɲga, ma bocdinaɲ yac tanɲatôc ɲa suc ahuc me dasiɲ kwi sôc sasac ɲapu dom. Mba! Tanɲiɲ êɲgalêɲ ɲalhu bu ɲawê pô gameɲ.

²² Ma ɲalêɲ tigeɲ, yom nan yêc siɲ dau me ɲahu sip ɲalôm gi, nan oc meɲ sa tiawê.

²³ Asa nan danɲasun bu yêc, nan ɲgô.”

²⁴ Ma iɲ gic têku yom ma sôm, “Akôc gauc ɲapep pi Anötö ndê yom nan mac aɲgô. Mac bu atac whiɲ bu aɲyalê ɲahu, dec Anötö oc kêɲ gauc têɲ mac, ma iɲ oc kôm mac nem gauc êɲsôwec tiatu.

25 Bu asa nan kôc Anötö ndê yom sa sip ndê ñalôm e tidôn, nan Anötö oc kêñ gauc têtñ in êñlêc. Magoc asa nan kôc sa tidôn dom, nan Anötö oc kôc in ndê yom hon su yêc in.”

Yom gôlin pi gêtñ ñawhê nan po pi men

26 Ma Yisu sôm, “Ñalên nan Anötö ndê gôlin kêsôwec, nan gitôm gêtñ ñawhê nan ñamalac dan sô sip ndê ôm.

27 Ma tinambu in yêc bêc ôbwêc ma tisa têtñ acsalô, ma ñawhê dau po pi men. Magoc ñamalac dau kêyalê ñalên dom.

28 Têtñ ñamata-nga ñawhê dau hóc nom kôc ma ñagatôm pi men, malô goc ñamlha sa ma tinambu gêm ñandô.

29 Magoc têtñ ndoc gêtñ ñandô dau tilôwê in oc ndic su, bu bêc sêhon gêtñ ñandô sa-nga men sa.”

Yom gôlin pi gêtñ ñawhê sauñ

(Mat 13:31-32; Luk 13:18-19)

30 Ma Yisu sôm, “Aô wasôm yom gôlin bocke tu bu wawhê ñalên nan Anötö ndê gôlin kêsôwec, nan sa? Aô wanem dôhôn pi gêtñ sake bu wawhê sa?

31 Anötö ndê gôlin gitôm gêtñ ñawhê sauñ andô dan nan dasô sip nom, gitôm a soc ñawhê.

32 Gêtñ dau gêtñ sauñ andô, tigen yac bu dasô sip nom ndi, dec oc po tiatu e hóc gêlêc gêtñ ôm-nga hon su. Ma ñasañgac oc sêhê baliñ e mbac lolôc-nga sêmen sêhê si ñaic yêc ayun ñayham dau.”

33 Yom gôlin kain dinan Yisu sôm têtñ lau ñapan. In kêtônôn ñac tôm ñac si gauc.

34 Yom hon nan in sôm têtñ ñac, nan in sôm ña yom gôlin. Ma têtñ têm nan in ti ndê ñgacsêñomi sêmbo tawasê, nan in whê gêtñ hon sa têtñ ñac.

*Yisu kôm bu ñamponj timalô
(Mat 8:23-27; Luk 8:22-25)*

³⁵ Têñ acsalô dinañ kêpiñ bu ñasec sa, nanj Yisu sôm têñ inj ndê ñgacsêñomi, “Yac dalhö, dapi bugic-tonj ñadañga dandi.”

³⁶ Goc sêhu lau tonj atu dinañ siñ ma sêkôc Yisu whiñ ñac sêpi wañ dañ ma sêlhö si. Ma wañ ñatô sêlac sêwhiñ.

³⁷ Sêlac si ma mbu puc atu ma gêli bu ñamponj sa gic sip wañ e kêpiñ bu wañ pac.

³⁸ Magoc Yisu tenj gwalim ma yêc bêc yêc wañku-nga. Ñgacsêñomi sêuñ inj sa, ma sêsôm têñ inj, “Kêdôhônwaga, bocke? Am hêgo daôm dom bu yac oc dandiñ, a?”

³⁹ Goc inj tisa, ma sôm yom ñañga têñ mbu ti bu ñamponj bocdec bu, “Nanj gitôm! Timalô!” Goc mbu timalô ma gameñ ñañeñ sa.

⁴⁰ Ma inj sôm têñ ñac bu, “Tu sake-nga mac atöc daôm kêlêc? Bocke? Mac akêñ whiñ aô dom, a?”

⁴¹ Magoc ñac sêsö ti sêtöc dau ñandô ma sêndac dandi, “Inj asa dec? Gêñ honj sêsöc inj ndê yom ñapu, ma mbu ti bu ñamponj sêwhiñ!”

5

*Yisu kôm ñgac ti ñalau sac ñayham sa
(Mat 8:28-34; Luk 8:26-39)*

¹ Yisu ti ndê ñgacsêñomi sêhök asê Bugictonj Galili-nga ñadañga têñ gameñ ac pi-nga, ma sêsök baö yêc lau Gerasa-nga si gameñ.

² Sêpi baö si, ma ñgac dañ nanj ñalau sac mbo inj ndê ñalôm, nanj sa akêñ ôm sêhök-nga ma têñ Yisu gi.

³ Inj ngac dau êlêmê ndöc ôm sêhônga, ma têm daêsam lau sêhsahê bu sêsônga inj dông nã wac me nã sen, magoc gitôm dom.

⁴ Têm daêsam sêsônga inj amba ti gahi dông nã sen, magoc inj hê sen kic ma sen gapocwalônga gahi-nãga su. Lau danj sêtôm dom bu sêkôm inj timalô.

⁵ Têng acsalô ti ôbwêc, inj mbo ôm sêhônga ti gamen nãbaö, ma tanj asê ma kôc hoc ma tuc-tuc dau nãmlisac.

⁶ Têng têm dinanj inj gêlic Yisu kalhac ahê, goc kêti gi ma pông haduc yêc inj anghônga.

⁷⁻⁸ Ma Yisu sôm têng inj, “Nãlau sac, am hu ngac dinanj sinj.” Dec nãlau dau mbwêc atu ma sôm, “Yisu, Anötö Nãclai ti Nãwasi Nãdau ndê Atu, am bu kôm sake têng aö? Tu Anötö ndê nãê-nãga, aö watenj am bu kôm aö nãjom dom.”

⁹ Goc Yisu ndac inj, “Am nem nãê asa?” Ma nãlau sac ô yom ma sôm, “Anenj nãê ‘Tonj Atu,’ bu yac nãlau daêsam.”

¹⁰ Ma nãlau dau tenj Yisu tidim daêsam, bu soc njac su yêc gamen dinanj dom.

¹¹ Têng têm dinanj bôc tonj atu senj gêng sêmbo lôc njapu yêc gamen dinanj.

¹² Goc nãlau sac sêtenj Yisu ma sêsôm, “Êmkinj yac atêng bôc dindê andi, bu yac asôc bôc si nãlôm.”

¹³ Yisu gôlôc goc nãlau sac sêhu ngac dinanj sinj, ma sêsôc bôc nãlôm si. Goc bôc honj sênti si e sêsip salic sac, ma sêsip bugictonj e bu kô njac sêmbac ndu. Bôc dau tonj atu, nãnamba gitôm 2,000.

¹⁴ Goc lau sêyob bôc-nãga sênti si, ma sic minj yom dinanj têng lau nanj sêmbo malac atu ti gamenj

ņamakê-ņga. Ma lau dau sêsa si bu sêlic gêņ nan Yisu kôm.

¹⁵ Sêhóc asê in ma sêlic ñgac nan Yisu soc ñalau sac toņ atu dinan su yêc in, nan ndöc ti gauc ñawa ma sôc ñakwê, dec ñac sêtöc dau.

¹⁶ Ma lau nan sêlic gêņ dau, nan sic min pi gêņ nan Yisu kôm têt ñgac ti ñalau sac, ma têt bôc.

¹⁷ Goc lau gameņ dinan-ņga sêten Yisu ñanğa bu hu ñac si gameņ sin.

¹⁸ Têt ndoc Yisu bu pi wan ndi, nan ñgac nan in soc ñalau sac su yêc in, nan ten in ñanğa bu whin in ndi.

¹⁹ Magoc Yisu sôm, “Mba! Am mbu têt nem lau ndi, ma ndic min têt ñac pi ñalêt nan Pômdau tawalô am, ma pi gêt hon nan in kôm têt am.”

²⁰ Goc ñgac dau kölhö gi, ma kêgihi gameņ nan sêsam bu Dekapolis,* ma gic min yom pi gêt atu nan Yisu kôm têt in. Ma lau hon sêhêdaê.

*Yisu kôm awhê lu ñayham sa
(Mat 9:18-26; Luk 8:40-56)*

²¹ Yisu ti ndê ñgacsêņomi sêpi wan ma sêmbu sêpi bugicton ñadanğa si. Ma têt ndoc in sip baö gi, nan lau toņ atu sêkac sa e sêņgihi in ahuc.

²² Ma ñgac dan ñaê Jairas, nan yob lau Israel-ņga si lôm wê-ņga yêc gameņ dinan, nan meņ hóc asê. In gêlic Yisu goc hu dau sip nom yêc in gahi-ņga.

²³ Ma in ten in ñanğa bocdec bu, “Anen bawhê saun gêmbac atu kêpiņ bu oc mbac ndu. Aö tac whin bu am mwen, kêņ amam sac in tu bu in mbac ndu dom, ma ñayham sa tiyham.”

* **5:20:** Dekapolis - ñaê dinan danem kwi bu ‘malac amanļu.’ Malac amanļu dinan sêyêc Bugicton Galili-ņga ñagameņ têt ac pi-ņga.

24 Goc Yisu whiñ in gi.

Yisu kêsêlêñ mbo, ma lau daêsam sêñkuc in ma sêñgihi in ahuc.

25 Lau toñ dinañ si dañ in awhê nañ gêm dac ñapañ tôm yala 12.

26 In kêsâlê dokta daêsam bu sênem in sa, ma gêmlihi ñac e in ndê mone hoñ pacndê. Magoc ñac sêtôm dom bu sênem in sa. In hôc ñandê atu tu ñac-ñga, ma gêmbac dau hôc gêlêc su.

27-28 Awhê dau ñgô Yisu ñawaê su, dec gauc gêm têtñ dau bu, “Aö bu wamasec in ndê ñakwê, dec oc kôm aö ñayham sa.” Tu dinañ-ñga in kêsêlêñ yêc lau toñ atu ñalôm kêkuc in, ma kêmasec in ndê ñakwê.

29 Ma ñagahô eñ in ndê dac sa tiyham dom, ma in kêsahê bu in ndê gêmbac pacndê su.

30 Yisu kêyalê bu ñaclai sa yêc in, goc ñagahô in kac dau kwi yêc lau toñ atu ñalôm ma ndac, “Asa kêmasec aö neñ ñakwê?”

31 Magoc in ndê ñgacsêñjomi sêô yom ma sêsôm, “Lic lau daêsam dindec s êkôm am si. Bocke dec am ndac bu ñac si asa kêmasec am?”

32 Magoc Yisu taso lau hoñ, ma kêsâlê ñamalac nañ kôm gêtñ dau.

33 Awhê dau kêyalê bu in ñayham sa su, dec têtñ Yisu gi ma pôn haduc yêc in anğô-ñga. In töc dau ti kêtitec mbo, ma hoc yom asê pi gêtñ nañ in kôm.

34 Goc Yisu sôm teñ in, “O aneñ bawhê, am nem kêtñ whiñ aö dec kôm am ñayham sa. Am ndi ti atac malô, kwahic dec am nem ñawapac pacndê su.”

35 Yisu sôm yom dinañ mbo, ma lau ñatô sêmeñ akêtñ Jairas ndê andu, ma sêsôm têtñ in, “Am atômwê mbac ndu su. Tu sake-ñga am bu kêtñ

ɲawapac tɛɲ Kêdôhôn-waga? Sôm tɛɲ in bu men dom.”

³⁶ Tigen Yisu hêgo dau tu ɲac si yom-ɲga dom, ma sôm tɛɲ Jairas, “Tôc daôm dom, kêɲ whiɲ.”

³⁷ Goc Yisu kalhac lau hon ahuc, ma kôc Pita, ma Jems lu ndê asidôwa Jon, ma sêwhiɲ Jairas si.

³⁸ Sêɲsêlêɲ si e sêhóc asê Jairas ndê andu, ma Yisu gêlic lau sêkôm ɲanta atu, ɲac sêhu danɲibo asê ma sêtaɲ.

³⁹ Goc in sôc gi ma ndac ɲac, “Mac akôm ɲanta ti danɲibo atu dindéc tu sake-ɲga? Bawhê dau mbac ndu dom, in yêc bêc naɲ yêc.”

⁴⁰ Magoc ɲac sêmbwac in. Yisu kêɲ ɲac sêsa awê si, ma kôc bawhê ɲadamba lu dinda ti ɲgacsêɲomi tō dinaɲ sêwhiɲ in si, ma sêsôc ɲalôm naɲ bawhê yêc.

⁴¹ In kêɲ bawhê dau sip amba ma sôm tɛɲ in, “Talita, k umi.” (Yom Hibu dau danem kwî bu, ‘Bawhê saun, am tisa.’)

⁴² Ma ɲagahô en bawhê dau, naɲ ndê yala ti 12, naɲ tisa ma kêsêlêɲ. Ma lau hon naɲ sêlic gêɲ dau, naɲ sêhêdaê ɲandô.

⁴³ Magoc Yisu kêɲ yao ɲaɲga bu sêsôm gêɲ dau asê tɛɲ lau ɲatô dom. Ma in sôm bu sêkêɲ gêɲ daney-ɲga tɛɲ bawhê dau neɲ.

6

Yisu ndê lau sêkôc in sa dom

(Mat 13:54-58; Luk 4:16-30)

¹ Yisu mbu tɛɲ in ndê malac-hu gi, ma in ndê ɲgacsêɲomi sêɲkuc in.

² Tɛɲ bêc Sabat-ɲga dan in sôc lôɲ wê-ɲga gi, ma gic hu kêdôhôn lau. Ma lau daêsam naɲ sêɲgô in

ndê yom, nanj sêhêdaê ma sêsôm têñ dandi, “Aluê! Inj ñgac dec tap gêñ honj dindec sa yêc nde? Asa kênj gauc atu-tu dinanj têñ inj, ma ñaclai tu kôm gêñ dalô-ñga?”

³ Inj yac neñ ñgac nanj munj-ñga kôm gwelenj kapenta-ñga. Inj Maria ndê atunjgac, ma Jems, Josep, Judas ma Saimon dôwa! Ma inj ndê lhuwêi sêmbo sêwhinj yac.” Ma ñac atac lu-lu tu inj-ñga.

⁴ Goc Yisu sôm têñ ñac, “Lau honj sêtoc propet danj sa, tigenj yêc inj ndê malachu, inj ndê asidôwai ma inj dau ndê lau sêtoc inj sa dom.”

⁵ Ma yêc gameñ dinanj inj gitôm dom bu kôm gêñ dalô daêsam. Inj kênj amba sac lau gêmbac tigenj-tigenj, ma kôm ñac ñayham sa.

⁶ Ma inj hêdaê bu ñac sêkênj whinj inj dom.

Tinjambu inj kêsêlêñ golom-golom malac, ma kêdôhônj lau.

*Yisu kêkinj ñgacsêñjomi 12 sêsa si
(Mat 10:7-11; Luk 9:1-5)*

⁷ Yisu mbwêc ndê ñgacsêñjomi 12 sêtêñ inj sêmenj, ma inj kêkinj ñac lu-lu sêsa sêtêñ malac ñatô si, bu sênem mêtê lau. Ma inj kênj ñaclai têñ ñac bu sêsoc ñalau sac su yêc lau.

⁸⁻⁹ Inj kêkinj ñac ti sôm yom têñ ñac bocdec bu, “Anjêlêñ andi, magoc akôc wapa daêsam dom. Asôc nem atapa ma akôc nem tôc, dec tôm. Ampwic hacgêlê dom, ma akôc gêñ danenj-ñga me awa me ñakwê aô daôm-ñga dom.

¹⁰ Têñ ndoc mac asôc malac danj andi, ma lau sêkôc mac sa asôc ñac si andu, nanj ambo whinj ñac e mac ahu malac dau sinj.

11 Ma lau malac dan-nga bu sêkôc mac ti nem yom sa dom, goc aton kop su yêc gahim têt ndoc mac ahu ñac siñ, bu atôc ñac si giso asê.”

12 Goc ñac sêlhô si ma sem mêtê bu lau sênem si ñalôm kwi ma sêhu mêtê sac siñ.

13 Sêsoc ñalau sac daêsam su yêc lau, ma sêmbac olib ñakwi pi lau gêmbac daêsam ma sêkôm ñac ñayham sa.

*Herod gauc gêm yom daêsam pi Yisu
(Mat 14:1-2; Luk 9:7-9)*

14 Lau sic miñ pi Yisu ñapan e in ndê waê tiapa, ma Kiñ Herod ñgô ñawaê pi in whiñ. Lau ñatô sêsôm bu, “Yisu in Jon, Ngac Kêku Lau-nga, nan tisa akêt lau batê-nga, ma bocdinañ in kôc ñaclai bu kôm gêt dalô.”

15 Ma ñatô sêsôm, “Mba! In ñgac dec in propet Elaija nan tisa akêt lau batê-nga.” Ma ñatô sêsôm, “Mba! In propet dan tôm propet akwa-kwa.”

16 Magoc têt têt Herod ñgô yom dinañ pi Yisu, nan in sôm, “Ngac dê mboe Jon, ñgac nan aõ gatim in kachu kic, nan tisa akêt lau batê-nga.”

*Herod gic Jon, Ngac Kêku Lau-nga ndu ñamin
(Mat 14:3-12)*

17-18 Muñ-nga, Herod kôc in asi Pilip ndê awhê Herodias ma gêm ti ndê awhê. Dec Jon hoc Herod ndê giso asê ma sôm têt in, “Am gêm nem asim ndê awhê, dec kôm gêt so sambuc.” Tu dinañ-nga Herod kêkiñ ndê lau siñ-nga bu sêkôc Jon dôn, ma sêkêt in ndôc gapocwalô.

19 Tu Jon ndê yom-nga, Herodias êlêmê tac ñandê têt in ma tac whiñ bu sêndic in ndu. Magoc in gitôm dom,

20 bu Herod kêyalê bu Jon in ngac gitên ti dabun, dec töc Jon ma yob in napep. Herod tac whin bu ngô Jon ndê yom, magoc Jon ndê yom kôm in gauc gêm yom daêsam.

21 Tinambu Herodias tap lênh dan sa bu lau sêndic Jon ndu. Têh Herod ndê bêc dinda kôc in-nga, nan Herod ndê mwasin dan ma kêgalêm in ndê lau atu-tu, ti lau bata sin-nga, ma lau bata Galili-nga.

22 Nac sêndöc mwasin dau nalôm ma Herodias atuwê sôc meñ ma tê wê. Gêh dau kôm Kin Herod ti ndê nacleñ hon atac nayham kêlêc. Goc in sôm têh bawhê dau, “Am ndac gêh bocke nan am atac whin, ma wakên têh am.”

23 Ma in kêmatin yom têh in bocdec bu, “Gêh nan am bu ndac, nan aö wakên têh am, tôm aö wawhê neñ wapa hon kôc ndi ton lu ma wakên ton dan têh am.”

24 Goc bawhê dau sa gi ma ndac dinda, “Aö wandac gêh sake?” Ma dinda ô yom ma sôm, “Am ndac Jon, Ngac Kêku Lau-nga ndê ngôlôn.”

25 Goc bawhê dau kac dau kwi ma kêtî mbu têh Kin Herod gi, ma sôm têh in bu, “Aö tac whin bu kwahic dec, am tim Jon, Ngac Kêku Lau-nga ndê kachu kic, goc kêh in ndê ngôlôn sip pele dan ma kêh têh aö, bu walic pi tanôn bu in mbac ndu nandô.”

26 Yom dau kôm Kin Herod nalôm nawapac atu, tigen tu in kêmatin yom yêc nacleñ hon ngô-nga, dec kôm tôm bawhê dau ndac.

27 Ma ngahô in kêkin ngac dan bu ndic Jon ndu ma kôc in ngôlôn mbu meñ. Ngac dau sôc gapoc-walô gi, tim Jon ndê kachu kic,

28 ma kêh ngôlôn sip pele dan. Goc kôc sa gi kêh

têḡ bawhê, ma bawhê kêḡ têḡ dinda gêlic.

²⁹ Têḡ tēm Jon ndê sêḡomi sêḡô gêḡ dau ḡawaê, naḡ sêmeḡ ma sêkôc inḡ ndê ḡamlanḡ sa, ma si sêḡsuhunḡ.

Yisu ndê ḡgacsêḡomi sêmbu sêmeḡ

³⁰ ḡgacsêḡomi naḡ Yisu kêkinḡ ḡac sêsa si, naḡ sêmbu sêtêḡ inḡ sêmeḡ, ma sic minḡ pi gêḡ honḡ naḡ sêkôm, ma yom naḡ sêndôhônḡ têḡ lau.

³¹ Têḡ tēm dinanḡ lau daêsam sêwê sêtêḡ Yisu sêmeḡ ḡapanḡ, dec ḡasawa mba bu inḡ ti ndê lau sêneḡ gêḡ. Tu dinanḡ-ḡga dec inḡ sôm têḡ ḡac, “Mac tamwasêm awḡinḡ aö, ma yac dasa gameḡ sawa danḡ dandi, ma tanḡwanḡ dauḡ.”

Yisu ḡôlôm lau 5,000

(Mat 14:13-21; Luk 9:10-17; Jon 6:1-15)

³² Bocdinanḡ ḡac sêpi wanḡ danḡ bu sêlhö sêtêḡ gameḡ sawa danḡ sêndi.

³³ Magoc lau daêsam sêlic ḡac sêpi wanḡ ma sêḡyalê bu Yisu ti ndê lau. Bocdinanḡ lau akêḡ malac honḡ yêc gameḡ dinanḡ sêḡkuc ḡac, sênti sêmbu baö ma sêhóc gêlêc ḡac.

³⁴ Têḡ tēm Yisu ti ndê ḡgac-sêḡomi sêsôc baö si, inḡ gêlic lau daêsam dinanḡ ma tawalô ḡac, bu ḡac sêtôm domba naḡ si ḡgac yob ḡac-ḡga mba. Dec inḡ ḡic hu kêdôhônḡ yom daêsam têḡ ḡac.

³⁵ Sêmbu e telha sa, ḡoc Yisu ndê ḡgacsêḡomi sêtêḡ inḡ si ma sêsôm, “Gameḡ dindec gameḡ sawa, ma ac pacndê.

³⁶ Kêḡ lau dau sêlhö sêtêḡ malac ti gameḡ ḡamakê-ḡga sêndi, bu sênemlhi gêḡ sêneḡ-ḡga.”

³⁷ Magoc Yisu sôm, “Mba! Mac daôm akêḅ gêḅ têḅ ḅac sêḅeḅ.” Ma ḅac sêḅ yom ma sêḅôm, “Lau dindec ḅac lau daêḅam andô! Yac bu anemlhi bolom ḅa mone atu gitôm †denarii 200, dec oc tôm bu ḅac hoḅ sêḅeḅ ḅagec-ḅagec. Yac akôm bocdinaḅ, a?”

³⁸ M a iḅ ndac, “Mac nem bolom hiḅga ndöc? Andi alic.” Ma ḅac si sêḅic goc sêḅbu sêḅeḅ ma sêḅôm, “Yac mba bolom limdaḅ, ma i lu sêḅdöc.”

³⁹ Goc Yisu sôm têḅ ḅac bu sêḅêḅ lau hoḅ sêḅdöc sic titoḅ-titoḅ sêḅdöc kwaḅ.

⁴⁰ Ma lau hoḅ sêḅdöc sic titoḅ-titoḅ, toḅ ḅatô gitôm lau 100, ma ḅatô gitôm 50.

⁴¹ Goc Yisu kôc bolom limdaḅ ma i lu sa, tatac undambê ma gêm mbec, goc pô bolom kôc-kôc, ma kêḅ têḅ ḅgacsêḅomi bu sêḅdic sam têḅ lau. Goc iḅ kôm bocdinaḅ pi i lu.

⁴² Lau hoḅ seḅ gêḅ e hôc ḅac dôḅ.

⁴³ Ma tiḅambu ḅgacsêḅomi sic bolom ti i ḅadêḅe sa sip gatop 12 e meḅhu.

⁴⁴ Yisu gôlôm lau toḅ atu dinaḅ, ma laḅḅac naḅ sêḅbo toḅ dau ḅalôm ma seḅ gêḅ, naḅ si namba gitôm 5,000.

*Yisu kêsêḅêḅ mbo bu ḅahô
(Mat 14:22-33; Jon 6:16-21)*

⁴⁵ Têḅ têm dinaḅ Yisu kêḅ ndê ḅ gacsêḅomi sêḅi waḅ daḅ si, ma kêḅiḅ ḅac sêḅmuḅ iḅ sêḅi bugictoḅ ḅadaḅga, bu sêḅêḅ malac Betsaida sêḅdi. Ma iḅ dau mbo baö bu kêḅ lau toḅ atu dinaḅ sêḅhõ si.

⁴⁶ Iḅ hu ḅac siḅ su, goc pi lôc daḅ gi bu teḅ mbec.

⁴⁷ ḅasec sa su, ma waḅ dau sa bugictoḅ ḅalhu, ma Yisu tawasê mbo baö.

⁴⁸ Inj gêlic ndê ñgac-sêñomi sêhêc wañ ñaŋga, bu mbu atu kêsêlêñ ma puc ñac dôñ. Têñ ôbwêc lôm inj kêsêlêñ mbo bu ñahô, ma sa têñ ñac gi. Inj bu hôc gêlêc ñac,

⁴⁹ magoc têñ ndoc sêlic inj kêsêlêñ mbo bu ñahô, ñac gauc gêm bu sêlic ñalau dañ. Ñac sêmbwêc atu,

⁵⁰ bu ñac honj sêlic inj ma sêtôc dau. Magoc ñagahô inj sôm yom têñ ñac bu, “Ñalôm pênj dôñ ma atôc daôm dom, bu aô dauñ dindec!”

⁵¹ Goc inj kêsêlêñ têñ ñac ma pi wañ gi. Ma mbu timalô ma binônj sip. Ñac sêhêdaê ñandô,

⁵² ñahu bu ñac sêlic gênj nañ inj kôm pi bolom ti i, magoc ñac si gauc sa dom pi inj ndê ñaclai. Ñac si ñalôm ñadandi.

*Yisu gêm lau gêmbac sa yêc malac Genesaret
(Mat 14:34-36; Jon 6:22-25)*

⁵³ Ñac sêhêc asê malac Genesaret yêc bugictonj ñadaŋga, ma sêsô wañ dôñ.

⁵⁴ Ñac sêsip baô si ma ñagahô lau sêñyalê bu Yisu.

⁵⁵ Goc sênti sêtêñ malac honj yêc gameñ dinañ, ma sêkêñ Yisu ñawaê. Ma tinjambu lau sêmbalañ si lau gêmbac sêtêñ malac bocke nañ sêngô bu Yisu mbo.

⁵⁶ Ma malac atu ti sauñ, me gameñ ñamakê-ñga bocke nañ Yisu mbo, nañ lau sêtoc si lau gêmbac sêyêc maket ñamala, ma sêteñ Yisu bu ñac sêmasêc inj me bu sêmasêc inj ndê ñakwê ñambwa. Ma lau honj nañ sêmasêc inj, nañ ñamlic ñayham sa.

*Gêñ nanj kôm ñamalac ñadômbwi sa yêc Anötö anjô-
nga*

(Mat 15:1-20)

¹ Lau Palêsai ti kêdôhônjwaga yomsu-nga ñatô akêñ Jerusalem sêtêñ Yisu si.

² Ma ñac sêlic bu inj ndê ñgacsêñomi ñatô sêñgwasinj amba dom ma señ gêñ. Bocdinañ ñac gauc gêm bu ñgac-sêñomi si amba ñadômbwi.

³ Ñac gauc gêm yom dinañ, ñahu bu lau Palêsai ti lau Israel-nga daêsam sêñkuc mêtê nanj lau andô sic dulu têtñ ñac, bu sêñgwasinj amba muñ su, goc sêñeñ gêñ.

⁴ Ma têtñ ndoc sêmbu akêñ maket sêmeñ,* nanj sêñgwasinj amba muñ, goc sêñeñ gêñ. Ma ñac sêñgwasinj laclhu ti akôp ma suc, ma sêñkuc mêtê kainj dinañ daêsam, nanj lau andô Israel-nga sic dulu têtñ ñac.

⁵ Bocdinañ lau Palêsai ti kêdôhônj-waga yomsu-nga dinañ sêndac Yisu, “Tu sake-nga am nem ñgac-sêñomi sêñkuc ñagôlinj nanj lau andô sic dulu têtñ yac, nanj dom, ma señ gêñ ti amba ñadômbwi?”

⁶ Ma Yisu ô yom ma sôm, “Propet Aisaya hoc yom asê muñ su, nanj hêganônj mac lau atim yom lau-nga solop. Yom dau sêto yêc bocdec bu:

Lau dindéc sêtoc aö sa ña whasuñ ñambwa, tigenj ñac si ñalôm yêc dañ dau-nga.

* **7:4:** Têtñ ndoc lau Palêsai ma lau †Skraib sêmbu maket, nanj semlhi gêtñ yêc lau Israel ñatô nanj sêhêgo dau tu Moses ndê yomsu-nga dom, ma †lau gameñ apa-nga nanj sêmbu maket ñamala. Ñac gauc gêm bu lau dau oc sêkôm ñac ñadômbwi sa yêc Anötö anjô-nga, ma bocdinañ sêñgwasinj amba têtñ ndoc sêmbu akêñ maket sêmeñ.

7 Nac sem akinj aö nandô dom, ma yom nanj sêndôhônj têtj lau, nanj njamalac si yomsu nambwa.” [Ais 29:13]

8 Goc Yisu gic têtju yom ma sôm, “Mac ahu Anötö ndê yomsu sinj, ma asap njamalac nambwa si nğôlinj dônj.

9 Mac alic nğayham bu asap mac daôm nem nğôlinj dônj, magoc atec Anötö ndê yomsu, a?

10 Bu Moses to Anötö ndê yomsu bocdec bu, ‘*Toc damam lu dinam sa.*’ Ma inj to yom danj whinj bocdec bu, ‘*Nğac danj bu sôm yom sac pi inj damba lu dinda, nanj lau sêndic inj ndu manj.*’

11 Tigenj mac andôhônj lau bu sênğilî yomsu dinanj. Njamalac danj ndê awa me gênj bu yêc bu nem damba lu dinda sa, magoc inj bu ndic yao gênj dau ma sôm têtj injlu, ‘Gênj nanj bu nem amlu sa, nanj gasam bu Koban.’ (Yom Koban dinanj nğahu bu inj kêyalinj gênj dau sa bu kênj ti da têtj Anötö.)

12 Tu dinanj-nğa inj gêm inj damba lu dinda sa dom, ma mac alic nğayham.

13 Nalênj dinanj mac asenj Anötö ndê yom popoc ma anğkuc lau andô si nğôlinj nanj apami sic dulu têtj mac. Mac akôm mêtê daêsam gitôm dinanj.”

14 Goc Yisu ta lau honj sêtêtj inj sêmenj tiyham, ma sôm, “Mac lau honj, anğô ma anyalê.

15-16 Gênj honj nanj yêc awê ma sip njamalac nğatac nğalôm, nanj nğadanj kôm inj nğadômbwi sa yêc Anötö anğô-nğa dom. Magoc mêtê ti gauc sac nanj menj akênj njamalac nğalôm, nanj kôm inj nğadômbwi sa yêc Anötö anğô-nğa.”

17 Tinğambu Yisu hu lau dinanj sinj ma inj ti ndê nğacsênğomi sêsôc andu danj si. Goc sêndac inj pi yom

gôlinj dinaŋ ŋahu.

¹⁸ Ma in ndac ŋac, “Bocke dec mac atôm lau ŋatô naŋ si gauc sa dom? Alic bu gêŋ n aŋ yêc awê, ma sip ŋamalac ŋatac ŋalôm, naŋ oc kôm in ŋadômbwi sa dom.

¹⁹ Ŋahu bu gêŋ dinaŋ sip in ŋalôm ti gauc dom, magoc sip in ŋatac ŋalôm goc tiŋambu sa meŋ tiyham.” (Yïsu ndê yom dinaŋ tôc asê bu Anötö gic yao gêŋ danen-ŋga danj bu gêŋ ŋadômbwi dom.)

²⁰ Ma in gic têku yom ma sôm, “Gêŋ sac bocke naŋ sa yêc ŋamalac si ŋalôm me whasuŋ, naŋ kôm in ŋadômbwi sa yêc Anötö aŋgô-ŋga.

²¹⁻²² Mêtê sac daêsam ŋahu yêc ŋamalac si ŋalôm. Gauc sac, mêtê sênem kaŋ gêŋ-ŋga, sêndic ŋamalac ndu-ŋga, mêtê mockaiŋ-ŋga naŋ lau naŋ sem dau sa su, ma lau naŋ sem dau sa su dom naŋ sêkôm, lêŋ atac whiŋ awa ti wapa-ŋga, mêtê sêlic lau sac-ŋga ti sêŋsau lau-ŋga, mêtê sêneŋ gêŋ ŋawahô-ŋga, mêtê ŋalôm ŋagalac-ŋga ti mêtê lêmuŋ-ŋga, ma sêsôm yom sac-sac-ŋga, mêtê sêtoc dau sa-ŋga, ma lêŋ gauc mbasi-ŋga.

²³ Mêtê sac kaiŋ dinaŋ hoŋ ŋahu yêc ŋamalac si ŋalôm, ma kôm ŋac ŋadômbwi sa yêc Anötö aŋgô-ŋga.”

*Awhê Kanan-ŋga danj kêŋ whiŋ ŋaŋga
(Mat 15:21-28)*

²⁴ Yïsu ti ndê ŋgacsêŋjomi sêhu gameŋ dinaŋ siŋ, ma sêtêŋ gameŋ naŋ yêc kêpiŋ malac Taya ma sêsôc andu danj si. In tec bu lau danj sêŋyalê gameŋ naŋ in mbo, magoc in gitôm dom bu siŋ dau.

²⁵⁻²⁶ Awhê danj mbo gameŋ dinaŋ, naŋ ŋalau sac danj mbo in atuwê ŋalôm. In awhê Grik-ŋga naŋ

dinda kôc in yêc gameŋ Sairo-Pionisia-ŋga. Têŋ ndoc awhê dau ngô ŋawaê pi Yisu, naŋ têt in gi, ma hu dau sip nom yêc in gahi-ŋga. Ma in teŋ Yisu ŋaŋga bu in soc ŋalau sac dau su yêc in atuwê.

²⁷ Ma Yisu sôm têt in, “Gêŋ ŋamata-ŋga dakêŋ gêŋ daneŋ-ŋga têt balêkoc bu sêneŋ e hôc ŋac dôŋ. Solop dom bu dakôc balêkoc si gêŋ daneŋ-ŋga, ma tambaliŋ têt giam sêneŋ.”

²⁸ Magoc awhê dau ô yom ma sôm, “Yomandô Pômdau, magoc giam naŋ sêndôc tebo ŋapu, naŋ seŋ gêŋ ŋapopoc naŋ balêkoc sêŋyain sip nom.”

²⁹ Goc Yisu sôm, “Tu am nem yom dinaŋ-ŋga dec aô wanem am sa. Am mbu ndi ma am oc lic bu ŋalau sac dau hu am atômwê siŋ su.”

³⁰ Goc awhê dau mbu têt ndê andu gi, ma tap sa bu ŋalau sac dau hu in atuwê siŋ ma bawhê dau yêc bêc yêc ndê mbô.

Ŋgac awha mba ma danŋasuŋ bic

³¹ Yisu ti ndê ŋgacsêŋomi sêhu malac Taya ŋagameŋ siŋ. Ŋac sêŋsêlêŋ sêmbô seŋ têt malac Saidon goc sêtêŋ bugicton Galili-ŋga, ma sêpi bugicton ŋadaŋga ma sêtêŋ gameŋ Dekapolis-ŋga si.

³² Yêc gameŋ dinaŋ lau ŋatô sêkôc ŋac dan danŋasuŋ bic ma awha mba ma sêtêŋ Yisu si, ma sêteŋ in bu kêŋ amba sac in.

³³ Lau daêsam sêlhac dindê, goc Yisu kôc ŋgac dau ma inlu sêsa ŋasawa sauŋ si sêlhac dau-ŋga. Ma in kêŋ amba-atu sôc ŋgac dau danŋasuŋ, ma in hu gasôp pi amba-atu ma kêŋ pi ŋgac dau êmbala.

³⁴ Goc in tatak undambê, sê awha atu, ma sôm têt in bu, “Epata.” (Yom dau danem kwi bu ‘Po asê.’)

³⁵ Ma ñagahô in ðanğasun po asê, êmbala tigolon, ma in sôm yom yêc awê.

³⁶ Yisu gic yao lau bu sêndic min pi gêñ ðinan têt lau ñatô dom, magoc sêsôc in ndê yom ñapu dom. In gic yao ñac tidim ðaêsam, magoc ñac sic min pi in hôc gêlêc su.

³⁷ Ma lau hon nan sênğô, nan sêhêdaê ñandô ma sêsôm, “In kôm gêñ hon ñapep en, ma gitôm bu kôm lau ðanğasun bic sênğô yom, ma lau awha mba sêsôm yom asê.”

8

Yisu gôlôm lau 4,000 (Mat 15:29-39)

¹ Têt têt ðinan lau ðaêsam sêkac sa tiyham e lau ton atu sêmbo sêwhin Yisu. In gêlic bu ñac si gêñ sêneñ-ñga mba, goc ta ndê ñgacsêñomi sêtêt in sêmeñ, ma sôm têt ñac bu,

² “Aô tañwalô lau ðindec, bu sêmbo sêwhin aô gitôm bêc tö su, ma ñac si gêñ sêneñ-ñga pacndê.

³ Ma aô bu wakêt ñac sêlhö ti gêñ yô ñac, dec ñac oc tagôlô yêc señ. Ñac si lau ñatô sêmeñ akêt gamen baliñ.”

⁴ Magoc in ndê ñgacsêñomi sêo in ndê yom ma sêsôm, “Yac ðambo gamen sawa, ma oc dakôc gêñ ðaneñ-ñga y êc nde, nan tôm bu lau hon ðindec sêneñ?”

⁵ Ma Yisu ndac ñac, “Mac nem bolom hinğa ndöc?” Ma ñac sêsôm, “Yac mba bolom 7 sêndöc.”

⁶ Goc Yisu sôm têt lau bu sêndöc sic sêndöc nom. Ma in kôc bolom 7 ðinan ma gêm ðanğe, pô kôc-kôc,

ma kêŋ têt ndê ngac-sêŋomi bu sêndic sam têt lau, dec sic sam.

⁷ Ma ŋac si i mwambwa ŋatô sêndöc, naŋ Yisu gêm mbec whiŋ, ma sôm bu sêndic sam têt lau.

⁸ Ma lau hoŋ seŋ e hóc ŋac döŋ, goc ngacsêŋomi sic ŋadêlê sa sip gatop 7 e meŋhu.

⁹ Lauŋgac naŋ seŋ gêt dau, naŋ si namba gitôm 4,000. Tiŋambu Yisu kêŋ ŋac sêlhö si,

¹⁰ ma iŋ ti ndê ngac-sêŋomi sêpi waŋ daŋ ma sêtêtŋ gameŋ naŋ sêsam bu Dalmanuta, naŋ si.

Lau Palêsai sêndac Yisu bu kôm gêt dalô

(Mat 16:1-4)

¹¹ Lau Palêsai ŋatô sêtêtŋ Yisu si, ma sic hu sêtŋsu iŋ. Ŋac bu sêtŋsahê iŋ, dec sêndac iŋ bu kôm gêt dalô daŋ bu töt asê bu iŋ kôt ŋaclai yêc Anötö ndê.

¹² Magoc Yisu h ulai ma sôm têtŋ ŋac, “Tu sake-ŋga mac lau têt dindec-ŋga aŋsalê gêt dalô? Yomandô wasôm t êŋ mac bu aö wakôm gêt dalô töt mac andac, naŋ daŋ dom.”

¹³ Goc iŋ hu ŋac siŋ ma pi waŋ tiyham whiŋ ndê ngac-sêŋomi ma sêlhö bu sêmbu sêpi bugicton ŋadaŋga sêndi.

Yisu puc lau Palêsai ti Herod si giso asê

(Mat 16:5-12)

¹⁴ Têtŋ ndoc ngacsêŋomi sêpi waŋ dau si, naŋ sêtŋhiŋ dau siŋ bu sêkôt bolom ŋatô, ma ŋac si bolom tigen yêc waŋ dau ŋalôm.

¹⁵ Ma Yisu sôm yom ti ŋaŋga têtŋ ŋac bu, “Ayob daôm ŋapep pi lau Palêsai si yist ma Herod ndê yist.”

¹⁶ Ma ŋac sem yomgalôm sêwhiŋ dandi ma sêsôm, “Iŋ sôm yom dinaŋ ŋahu bu yac neŋ bolom mbasi.”

17 Yisu kêyalê yom naŋ ɲac sêsôm, dec sôm têtɲ ɲac, “Tu sake-ɲga mac am yomgalôm ma gauc gêm bu yom naŋ aõ gasôm pi yist, naŋ ɲahu bu mac nem bolom mba? Bocke mac nem gauc sa pi gêtɲ hon naŋ aõ gakôm, naŋ dom? Mac nem ɲalôm ɲadandi sa, a?”

18 Tanôm yêc, magoc mac alic gêtɲ daŋ ɲapep dom. Daŋamsuŋ yêc, magoc mac aŋgô yom dom. Gauc nem gêtɲ naŋ aõ gakôm su.

19 Têtɲ têtɲ naŋ aõ gac sam bolom amanɲaŋ têtɲ lau 5,000, naŋ mac ahonɲ ɲadêlê sa sip gatop hiŋga?” Ma sêsôm, “Gatop 12.”

20 Goc Yisu sôm, “Ma têtɲ têtɲ naŋ aõ gac sam bolom 7 têtɲ lau 4,000, naŋ mac ahonɲ ɲadêlê sa sip gatop hiŋga?” Ma sêsôm “Gatop 7.”

21 Goc iŋ sôm têtɲ ɲac, “Ma bocke dec mac nem gauc sa su dom?”

Yisu kôm ɲgac tapec ɲayham sa

22 ɲac sêlac waŋ si e sêhôt asê malac Betsaida. Ma lau ɲatô sêkôt ɲgac tapec daŋ sêtêtɲ Yisu si, ma sêndac Yisu bu kêŋ amba sac iŋ.

23 Goc Yisu kêŋ iŋ sip amba, ma wê iŋ sa malac ɲamakê gi. Iŋ hê gasôp pi iŋ tandô ma kêŋ amba sac iŋ, ma ndac, “Am gêlic gêtɲ daŋ me mba?”

24 Ma ɲgac dau hôt tandô sa ma sôm, “Aêc, aõ galic ɲamalac sêŋsêlêŋ sêmbo, magoc galic ɲac ɲadauŋ-dauŋ. Aõ galic ɲac sêtôm a.”

25 Goc Yisu kêŋ amba sac iŋ tandô tiyham, ma iŋ tandô po asê ma ɲayham sa. Ma iŋ gêlic gêtɲ hon ɲawa ɲayham.

26 Goc Yisu kêŋ iŋ kôlhô gi ma sôm, “Am lhô solop têtɲ nem andu ndi. Mbu sôt malac dec ndi dom.”

*Pita hoc Yisu nahu asê
(Mat 16:13-20; Luk 9:18-21)*

²⁷ Tiñambu Yisu ti ndê ngac-sêñomi sêlhö bu sêtêñ malac ñatô nan yêc kêpiñ Sisaria-Pilipai sêndi. Sêñsêlêñ sêmbo señ ma Yisu ndac ñac bocdec bu, “Lau sêsôm bu aö asa?”

²⁸ Ma ñac sêsôm têtñ in, “Lau ñatô sêsôm bu am Jon, Ngac Kêku Lau-nga, ma ñatô sêsôm bu am Elaija, ma ñatô sêsôm bu am propet akwa-kwa si dan.”

²⁹ Dec in ndac ñac, “Ma mac daôm, mac asôm bu aö asa?” Ma Pita ô in awha ma sôm, “Am Mesaya dau.”

³⁰ Goc Yisu gic yao ñac bu sêsôm in asê têtñ lau dan dom.

*Yisu sôm gwanan bu in oc hôc ñandê
(Mat 16:21-23; Luk 9:22)*

³¹ Têtñ têtñ dinan Yisu gic hu kêtôhôn ñac pi gêtñ nan oc hôc asê ñamalac ndê Atu. In oc hôc ñawapac daêsam, ma lau bata Israel-nga ti †dabuñsiga atutu ma lau nan sêndôhôn yomsu oc sêtec in. Lau oc sêndic in ndu, ma tiñambu bêc tö niñga su in oc tisa tiyham.

³² In sôm yom dinan yêc awê, dec Pita kôc in sa ñasawa sauñ gi, ma sôm in.

³³ Magoc Yisu kac dau kwi, tahê ndê ngacsêñomi ma sôm Pita bocdec bu, “Sadan, kôc daôm sa lhö su! Bu am kêyalê Anötö ndê lêtñ dom, am bu êmkuc ñamalac si gauc ñambwa.”

*Lau nan sêtñkuc Yisu oc sêhôt ñawapac
(Mat 16:24-28; Luk 9:23-27)*

34 Goc in mbwêc ndê ngac-sênomi ti lau daêsam nan sênkuc in, nan sêtên in sêmen, ma sôm têt ngac, “Asa nan tac whin bu ênkuc aö, nan êngwiniñ dau ma hóc ndê a gicso dau sa, ma ênkuc aö.

35 Bu asa nan tac whin bu sap gêt nom-nga dön napan tu mbo tali-nga, nan oc niñga. Magoc asa nan bu hu gêt nom-nga sin tu ênkuc aö-nga ma tu nawae nayham-nga, nan oc niñga dom.

36 Namalac dan bu po gêt nom-nga hon sa, magoc in dau gatu bu niñga, dec gêt nom-nga hon dinan oc tòm dom bu nem in sa.

37 Bu gêt nayham bocke yêc, nan gitôm bu dakên têt Anötö ô yac neñ gatuñ?

38 “Lau têt dindéc-nga nac lau sac, ma sêpuc dômbwê Anötö ma sêsa si lêt bambalin tòm lau mockain-nga. Asa nan kwahic dec maya tu aö ti aneñ yom-nga, nan Namalac ndê Atu oc maya tu in-nga têt ndoc nambu-nga nan in mbu men ti Damba Anötö ndê nawasi, ma anjela dabuñ sêwhin.”

9

1 Ma in sôm têt nac, “Yomandô aö wasôm têt mac! Lau natô kwahic dec sêmbö, nan oc gacgen sêmbö tali e sêlic Anötö ndê gôlin men sa tiawê ma ti nac lai atu.”

*Pita, Jems ma Jon sêlic Yisu ndê nawasi
(Mat 17:1-13; Luk 9:28-36)*

2 Bêc 6 ginğa su goc Yisu kôc Pita, Jems ma Jon sêwhin in, ma nac tawasê sêpi lôc balin dan si. Têt têt dinan Yisu ndê namlic kain dan sa, ma sêlic in ndê nawasi.

³ In ndê ñakwê sêp sambuc ma ñawasi atu, hôc gêlêc gêñ sêsêp nom-ñga hon.

⁴ Ma sêlic Elaija lu Moses sêhoc dau asê, ma inlu sem yomgalôm sêwhiñ Yisu.

⁵ Goc Pita sôm têñ Yisu, “Kêdôhônwaga, ñayham kêlêc bu yac dambo lec. Yac oc akwê bac tö tu mac ambo-ñga, am nem bac dan, Moses nde dan, ma Elaija ndê bac dan.”

⁶ Ngacsêñomi tö dinañ sêtöc dau atu, ma bocdinañ Pita gêm gauc yom tu sôm-ñga.

⁷ Têñ dinañ dao dan meñ kêgatöc ñac ahuc, ma awha dan sa yêc dao ñalôm, nañ sôm, “Aö neñ atungac dau dindec, nañ aö atac whiñ ndu andô. Anğô in ndê yom mañ.”

⁸ Ma ñagahô ñac tahê gameñ dau, ma sêlic bu Yisu tawasê mbo whiñ ñac.

Gêndac pi Elaija
(Mat 17:10-13)

⁹ Tinambu ñac sêsip akêñ lôc dau sêmeñ, ma Yisu kêñ yao bu sêsôm yom pi gêñ nañ sêlic yêc lôc, nañ asê dom e tôm Ñamalac ndê Atu tisa akêñ lau batê-ñga.

¹⁰ Tu dinañ-ñga ñac sem yom dinañ ahuc yêc ñac dau, magoc sem yomgalôm sêwhiñ dandi ñapan pi gêñ dau. Nahu bu Yisu ndê yom pi in tisa akêñ lau batê-ñga, nañ sênyalê nahu dom.

¹¹ Ma sêndac Yisu, “Lau Skraib nañ sêndôhôn yomsu, nañ sêsôm bu Elaija oc meñ hôc asê mun, ma tinambu Mesaya oc meñ. Yom dau nahu bocke?”

¹²⁻¹³ Ma Yisu sôm, “Elaija gic waê bu hôc asê mun Mesaya, bu êmasañ gêñ hon tisolop. Ma aö wasôm têñ mac, bu Elaija meñ hôc asê su. Ma lau sêkôm

mêê sac têtj inj tòm ñac atac whinj, tòm Anötö ndê yom nanj sêto yêc gwanañ su. Ma yom nanj sêto yêc pi Ñamalac ndê Atu nanj sôm bu inj gic waê bu hôc ñandê atu, ma lau oc sêpu inj ma sêtec inj. Mac anjalê yom dau ñahu, me mba?”

*Yisu soc ñalau sac su yêc balê danj
(Mat 17:14-21; Luk 9:37-43)*

¹⁴ Yisu ma ñgacsêñomi tö dinañ sêsip akêñ lôc dau sêmenj ma sêlic bu kêdôhônwaga yomsu-ñga ñatô ma Yisu ndê ñgacsêñomi ñatô sêsôm dau sêmbo, ma lau toñ atu sêñgihi ñac ahuc.

¹⁵ Têtj ndoc lau honj dinañ sêlic Yisu nanj sêhêdaê ñandô, ma sênti sêtêtj inj si ti sêhê mwalêc inj.

¹⁶ Ma Yisu ndac ñac bu, “Mac asôm daôm pi yom bocke?”

¹⁷ Ma ñamalac danj nanj mbo lau toñ atu ñalôm, nanj ô yom ma sôm, “Kêdôhônwaga, aô gakôc anenj balê dindêc gameñ, bu ñalau sac danj mbo inj ñalôm ma kôm inj awha mba.

¹⁸ Têm ñatô ñalau sac dau kôc inj dôñ ma tuc inj sip nom gi, kôm inj whapwic sa ma señ lhô, ma inj amba ti gahi ñañga sa. Aô gandac am nem ñgacsêñomi bu sêsoc ñalau dau su, magoc ñac sêtôm dom.”

¹⁹ Yisu ñgô yom dau ma sôm, “O mac lau, aô gambo gawhinj mac ñasawa hic baliñ su, ma bocke mac atôm dom bu akôm gêñ danj? Aô wambo wawhinj mac ñapañ dom! Mac nem akêñ whinj mbasi. Akôc balê dau sa amenj.”

²⁰ Dec sêkôc balê dau sêtêtj Yisu sêmenj, ma têtj têtj ñalau sac gêlic inj, nanj ñagahô inj kêmwanañ balê dau ti ñañga, goc tuc inj sip nom gi, ma inj kêpi ti whapwic sa yêc nom.

²¹ G oc Yisu ndac balê dau ñadamba, “Ñalau sac kôm in bocdinañ tòm yala hiñga?” Ma damba sôm, “In mbo bocdinañ têt têt in balêkoc saun ñapañ e kwahic dec.

²² Ma ndoc daêsam ñalau sac dau tuc in peñ sip bu me sip ya, ma kôm bu ndic in ndu niñga. Tigen am bu nditôm, dec tamwalô alu ma nem alu sa.”

²³ Goc Yisu sôm têt in, “Bocke dec am sôm têt aö, ‘Am bu nditôm?’ Mac bu akêt whin, dec gêt hon oc nditôm.”

²⁴ Ma ñagahô balê ñadamba ta yom ma sôm, “Aö gakêt whin. Nem aö sa bu wakêt whin ñaŋga.”

²⁵ Yisu gêlic bu lau daêsam sênti sêmeñ, dec hec yom ñalau sac ma sôm, “Am ñalau dangasun bic ma awha mba-ŋga, aö wandic atu am bu hu balê dindec sin, ma sôc in ñalôm tiyham dom!”

²⁶ Goc ñalau sac dau mbwêc asê ma kêmwanañ balê dau ñalêt sac, goc sa awê gi. Ma balê dau yêc gitôm ñac batê dan, dec lau daêsam sêsôm, “In mbac ndu su.”

²⁷ Tigen Yisu kêm in sip amba, keñ in sa, ma in tisa kalhac.

²⁸ Tiñambu Yisu sôc andu dan gi, ma in ndê ñgacsêñomi sêndac in gelec, “Bocke dec yac atôm dom bu asoc ñalau dinañ su?”

²⁹ Ma in sôm, “Mac bu asoc ñalau kaiñ dinañ su, nañ aten mbec ñaŋga. Ñalêt dan mba.”

*Yisu sôm tiyham bu in oc mbac ndu ma tisa
(Mat 17:22-23; Luk 9:43-45)*

³⁰⁻³¹ Yisu ti ndê ñgacsêñomi sêhu gameñ dinañ sin, ma sêñsêlêt sêmbo gameñ Galili-ŋga. Yisu bu êndôhôn ñac têt têt dinañ, dec tec bu lau sêñyalê gameñ nañ ñac sêmbo. In sôm têt ñac, “Tiñambu oc

sêkêŋ Ŋamalac ndê Atu sip lau ŋatô amba. Ŋac oc sêndic inŋ ndu, magoc têtê bêtê tō niŋga su, inŋ oc tisa tiyham.”

³² Magoc ŋac si gauc sa pi inŋ ndê yom dom, ma sêtôc dau bu sêndac inŋ pi yom dau ŋahu.

Asa ti ŋamalac ŋamata-ŋga?

(Mat 18:1-5; Luk 9:46-48)

³³ Ŋac sêŋsêlêŋ e sêhôt asê malac Kapenaom, goc si sêndôc andu daŋ. Ma Yisu ndac ŋac, “Mac asenŋ daôm pi gêtê sake yêc senŋ?”

³⁴ Magoc ŋac sem dôŋ, bu yêc senŋ ŋac sem yomgalôm sêwhiŋ dandi pi ŋac si asa inŋ ŋac ŋamata-ŋga.

³⁵ Yisu ndôc sic ma ta ŋgacsêŋomi 12 sêtêŋ inŋ si, ma sôm têtê ŋac, “A sa naŋ bu ti ŋamalac ŋamata-ŋga yêc Anôtô aŋgô-ŋga, naŋ êŋgwiniŋ dau ti ŋgac ŋambu-ŋga, ma nem akiŋ lau hoŋ.”

³⁶ Goc inŋ kôt balêkoc sauŋ daŋ ma kêtê inŋ kalhac ŋac ŋalhu. Ma inŋ kêtêgape inŋ ma sôm,

³⁷ “Asa naŋ bu kôt balêkoc sauŋ daŋ tôm inŋ dindec, naŋ sa tu aö neŋ ŋaê-ŋga, naŋ gitôm inŋ kôt aö dauŋ sa. Ma asa naŋ kôt aö sa, naŋ kôt aö taŋwasêŋ sa dom, magoc kôt Damaŋ naŋ kêtêŋ aö gamenŋ, naŋ sa bocdinaŋ.”

Lau naŋ sêkôm gwelenŋ tu Yisu-ŋga, naŋ sêwhê dau kôt dom

(Luk 9:49-50)

³⁸ Têtê bêtê daŋ Jon sôm têtê Yisu bu, “Kêdôhônwaga, yac alic ŋac daŋ kôm gwelenŋ ma soc ŋalau sac su yêc lau ŋa am nem ŋaê. Yac ac yao inŋ, bu inŋ kêtêkuc am whiŋ yac dom.”

³⁹ Magoc Yisu sôm, “Alhac in ahuc dom, bu ñamalac nañ kôm gêñ dalô ña aneñ ñaê, nañ gitôm dom bu kac ndê awha kwi ñagahô, ma sôm yom sac pi aô.

⁴⁰ Asa nañ kêñ kisa yac dom, nañ yac neñ dañ.

⁴¹ Yomandô aô wasôm têtñ mac bu asa nañ kôm gêñ saun dañ bu nem mac sa tu mac añkuc aô Kilisi-nga, gitôm in kêñ bu laclhu dañ têtñ mac anôm, nañ Anötö oc êñlhiñ in siñ dom. In oc kêñ ñagêyô ñayham têtñ in.”

Puc pi lêtôm

(Mat 18:6-9; Luk 17:1-2)

⁴² Ma Yisu sôm, “Ñamalac dañ bu tim balêkoc saun dañ nañ kêñ whiñ aô bu kôm mêtê sac, nañ kôm giso atu. Oc ñayham bu dasô hoc atu dañ pi in kachu, ma tambaliñ in sip gwêc ndi niñga. Ma bocdinañ oc tôm dom bu in tim balêkoc dau, ma tiñambu tap Anötö ndê matôc sa.

⁴³⁻⁴⁴ “Am amam bu kôm sac, nañ tim kic. Am bu tap undambê sa, ma ndöc tamli ti amam gatuc, nañ ñayham hôc gêlêc am kôm sac ña amam lu-lu e am sip ya lambwam-nga nañ sa ñapañ, nañ ndi.

⁴⁵⁻⁴⁶ Ma gahim bu kôm sac, nañ tim kic. A m bu tap undambê sa, ma ndöc tamli ti gahim gatuc, nañ ñayham hôc gêlêc am kôm sac ti gahim lu-lu e Anötö tuc am sip ya lambwam-nga nañ sa ñapañ, nañ ndi.

⁴⁷ Ma am nem tanôm bu kôm sac, nañ kip sa. Am bu ndöc Anötö ndê gameñ undambê-nga ti tanôm tigen, nañ ñayham hôc gêlêc am kôm sac ti tanôm lu-lu e Anötö tuc am sip lambwam ndi.

48 Yêc gameŋ dinanŋ lau oc sêhôc ŋandê ŋapanŋ, tôm yom nanŋ Aisaya to yêc bocdec bu, ‘*Dombo oc mbac ndu dom, ma ya oc sa ŋapanŋ.*’

49 “Bocdinanŋ ayob daôm tu lêtôm-ŋga, bu Anötö oc kêŋ ya êmbô lau honŋ,* gitôm lau sêkêŋ gwêc so pi wata tu bu yêc ŋayham ŋasawa baliŋ.

50 Gwêc so dau inŋ gêŋ ŋayham, magoc ŋamakic bu niŋga, oc dakôm ŋamakic sa tiyham ŋalêŋ nde? Bocdinanŋ ambo lau nom-ŋga ŋalôm atôm gwêc so, ma ambo awhiŋ daôm ti yom malô.”

10

Anötö tec bu awhê lu ŋac sêhu dau siŋ (Mat 19:1-12)

1 Yisu ti ndê ŋgacsêŋomi sêhu gameŋ dinanŋ siŋ, ma sêtêŋ gameŋ Judia-ŋga si. Goc sêpi Bu Jordan ŋadanŋa nanŋ yêc têtŋ gameŋ ac pi-ŋga, nanŋ si. Yêc gameŋ dinanŋ lau daêsam sêkac sa tiyham ma sêtêŋ inŋ si, ma inŋ kêkuc inŋ ndê mêtê ma kêdôhônŋ ŋac.

2 Ma lau Palêsai ŋatô sêmenŋ ma bu sêtim Yisu, dec sêndac inŋ bocdec bu, “Ŋgac danŋ bu hu ndê awhê siŋ, nanŋ oc êŋgili yomsu, me mba?”

3 Ma Yisu ndac ŋac ô, “Moses to yomsu bocke?”

4 Goc sêsôm, “Moses sôm bu ŋgac danŋ gitôm bu to bapia hu nawhê siŋ-ŋga, goc hu ndê awhê siŋ.”

* **9:49:** Yom nanŋ yêc ŋabatiŋ 49 nanŋ ŋahu yêc awê dom, magoc lau ŋatô gauc gêm bocdec bu. Anötö tac whiŋ bu lau sêkêŋ whiŋ Yisu-ŋga sêhu mêtê sac honŋ siŋ ma sêsa lêtŋ gitêŋ eŋ. Gêŋ bocke nanŋ bu lhac ŋac ahuc tu sêtap gameŋ undambê-ŋga sa, nanŋ sêhu siŋ tôm yom nanŋ yêc ŋabatiŋ 43-47 whê sa. Ma Anötö oc kêŋ ya êmbô lau gitôm lau sêpec gol ŋa ya tu bu ŋadômbwi niŋga ma gol ŋawasi solop yêc.

⁵ Ma Yisu sôm, “Aêc. Moses to yomsu dinan tu mac nem ñalôm ñadandi-ña.

⁶ Magoc têt têt Anötö kên undambê ti nom, nan in kêmasan ñamalac ñgac ti awê.

⁷ Ma tu dinan-ña ‘*ñgac dan oc hu damba lu dinda sin, ma sap in nawê dô,*

⁸ *ma inlu sêti gên tigen.’* Yom dau whê sa bu inlu sêmbo sêtôm ñamalac lu dom, inlu sêti gên tigen yêc Anötö ñgô-ña.

⁹ Bocdinan yham dom andô bu ñamalac sêkac gên nan Anötö dau kên pitigen, nan su.”

¹⁰ Tinambu Yisu ti ndê ñgac-sênjomi sêndöc andu dan, ma sêndac in pi yom dinan ñahu.

¹¹ Ma in sôm, “Ñgac nan hu in ndê awê sin ma gêm awê wakuc, nan kôm gên mockain-ña têt in yêc Anötö ñgô-ña.

¹² Ma awê nan hu nakwen sin ma gêm ñgac wakuc, nan kôm gên mockain-ña bocdinan.”

Yisu gêm mbec balêkoc

(Mat 19:13-15; Luk 18:15-17)

¹³ Têt bêt dan lau sêhoñ si balêkoc sêtên Yisu si, bu in kên amba sac ñac. Magoc in ndê ñgac-sênjomi sêsôm dinda ti dambai.

¹⁴ Têt têt Yisu gêlic gên dau in tac ñandê, ma sôm têt ñac, “Atec balêkoc dinan sêtên aô sêmên. Alhac ñac ahuc dom, bu Anötö ndê gôlin gic lau nan sêtôm balêkoc sauñ dindec, nan ñawaê.

¹⁵ Aô wasôm yomandô têt mac bu asa nan bu sôc Anötö ndê gôlin ñapu gitôm balêkoc sauñ dan dom, nan oc nditôm dom bu sôc ndi.”

¹⁶ Goc in kôc balêkoc dau sa ma kêgape ñac. Ma in kên amba sac ñac, ma gêm mbec ñac.

*Ngac ti lélôm**(Mat 19:16-22; Luk 18:18-23)*

17 Yisu ti ma kêsêlêŋ mbo seŋ whiŋ ndê ngacsêŋomi. Ma ngac daŋ kêti meŋ ma pôn haduc yêc iŋ aŋgô-ŋga, ma ndac iŋ bocdec bu, “Kêdôhônwaga ŋayham, aô wakôm bocke dec tiŋambu Anötö oc kôc aô sa wandöc taŋli ŋapaŋ.”

18 Goc Yisu sôm têŋ iŋ, “Tu sake-ŋga am sam aô bu ŋayham? Anötö tigen iŋ ŋayham.

19 Am kêyalê yomsu naŋ Anötö kêŋ têŋ Moses, ‘Ndic ŋamalac ndu dom. Kôm gêŋ mockaiŋ-ŋga dom. Nem kaŋ gêŋ dom. Sôm yom tasan pi lau dom. Êmsau lau bu kôc ŋac si gêŋ dom,’ ma ‘Toc damam lu dinam sa.’”

20 Ma iŋ sôm, “Kêdôhôn-waga, aô kakuc yomsu hoŋ dinaŋ, têŋ ndoc aô gambo balê ŋapaŋ e kwahic dec.”

21 Yisu tahê iŋ ma tac whiŋ iŋ kêlêc. Ma iŋ sôm, “Gêŋ tigen yêc tu am kôm-ŋga. Am ndi, kêŋ am nem gêŋ hoŋ têŋ lau sênemlhi, ma kêŋ ŋa-awa têŋ lau ŋalôm sawa. Ma bocdinaŋ am nem awa ŋandô oc yêc undambê. Ma tiŋambu am mweŋ ma êmkuc aô.”

22 Magoc têŋ têm ngac dau ŋgô Yisu ndê yom dinaŋ iŋ wec, ma kölhö ti ŋalôm ŋawapac gi. Ŋahu bu iŋ ngac ti lélôm.

*Puc pi awa ti wapa**(Mat 19:23-30; Luk 18:24-30)*

23 Goc Yisu tahê lau hoŋ, ma sôm têŋ iŋ ndê ngacsêŋomi, “Lau ti lélôm si awa ti wapa kalhac ŋac ahuc e gitôm dom bu sêsôc Anötö ndê gôliŋ ŋapu ŋagahô.”

²⁴ Nac sêngô inj ndê yom dinaŋ e sêhêdaê. Ma Yisu sôm têŋ ŋac tiyham, “O aneŋ balêkoc atac whiŋ-ŋga, ŋamalac bu sêsôc Anötö ndê gôliŋ ŋapu, naŋ gêŋ saŋ dom.

²⁵ Bôc atu daŋ gitôm kamel, oc tôm bu sôc so ŋalasê ŋagahô, hóc gêlêc ŋgac ti lêlôm daŋ bu sôc Anötö ndê gôliŋ ŋapu.”

²⁶ Yisu ndê ŋgac-sêŋomi sêngô yom dinaŋ ma sêhêdaê ŋandô. Ma sêsôm têŋ dandi, “Bu bocdinaŋ dec asa oc tôm bu tap Anötö ndê mwasiŋ nem lau si-ŋga sa? Oc ŋawapac atu!”

²⁷ Yisu tahê ŋac ma sôm, “Gêŋ naŋ ŋamalac sêtôm dom bu sêkôm, naŋ Anötö gitôm bu kôm, bu Anötö gitôm bu kôm gêŋ hoŋ.”

²⁸ Goc Pita sôm têŋ inj, “Yac oc bocke? Yac ahu gêŋ hoŋ siŋ tu aŋkuc am-ŋga.”

²⁹ Ma Yisu ô yom ma sôm, “Aô wasôm yomandô têŋ mac. Asa naŋ bu hu andu, me asidôwai, me lhuwêi, me dinda lu damba, me balêkoc, me nom siŋ tu aô-ŋga ma tu gwelenŋ ŋawaê ŋayham-ŋga,

³⁰ naŋ Anötö oc kêŋ gêŋ kaiŋ dinaŋ daêsam têŋ inj ô, têŋ ndoc inj mbo nom. Ma inj oc tap kisa ti ŋawapac sa tu aô-ŋga whiŋ. Ma têŋ têm ŋambu-ŋga, Anötö oc kôc inj sa, ma kêŋ inj ndöc tali ŋapaŋ yêc undambê.

³¹ Tigerŋ lau daêsam naŋ kwahic dec sêti lau ŋamata-ŋga, naŋ oc sêti lau ŋambu-ŋga, ma lau ŋambu-ŋga oc sêti lau ŋamata-ŋga.”

*Yisu sôm tiyham bu inj oc mbac ndu
(Mat 20:17-19; Luk 18:31-34)*

³² Yisu wê inj ndê ŋgacsêŋomi ma sêŋsêlêŋ sêmbo seŋ bu sêtêŋ Jerusalem sêndi. Inj ndê ŋgac-sêŋomi

sêñsêlêñ ti sêhêdaê, ma lau ñatô nañ sêñsêlêñ sêwhiñ ñac, nañ sêtöc dau.* Bocdinañ Yisu kôc ñgacsêñomi 12 sêsa si sêlhac dau-ñga, ma sôm yom tiyham pi gêñ nañ oc hôc asê iñ.

³³ Iñ sôm, “Kwahic dec yac bu dapi malac Jerusalem dandi, ma ñgac dañ oc hoc Ñamalac ndê Atu asê ma kêñ iñ sip dabuñsiga atu-tu ti kêdôhôn-waga yomsu-ñga amba. Ñac oc sêkic yom bu sêndic iñ ndu, ma sêkêñ iñ sip lau Rom-ñga amba.

³⁴ Ñac oc sêsu iñ susu, sêhê gasôp pi iñ, sêndic iñ ñamlic ñandê ma sêndic iñ ndu. Magoc tiñambu bêc tó niñga su, goc iñ oc tisa tiyham.”

*Jems lu Jon bu sêhêc gêlêc ñgacsêñomi ñatô
(Mat 20:20-28)*

³⁵ Jems lu Jon, Sebedi ndê atuñgac lu, sêtêñ Yisu si ma sêsôm, “Kêdôhôn-waga, alu atac whiñ gêñ dañ, ma bu andac am bu kôm gêñ dau ñandô sa.”

³⁶ Goc Yisu ndac, “Amlu atac whiñ bu aö wakôm sake?”

³⁷ Ma sêsôm, “Alu atac whiñ bu têtñ ndoc am ndöc nem pôn kiñ-ñga ti ñawasi atu, nañ am kêñ alu andöc awhiñ am, dañ ndöc amam andô-ñga ma dañ ndöc gasê-ñga.”

³⁸ Magoc Yisu ô yom ma sôm, “Amlu añyalê gêñ nañ amlu andac, nañ dom. Amlu atôm bu anôm gêñ sip laclhu ñawapac-ñga nañ aö wanôm, a? Ma atôm bu aliñ sanğu† nañ aö oc waliñ, a?”

* **10:32:** Lau nañ sêñkuc Yisu nañ sêhêdaê ti sêtöc dau, ñahu bu ñac gauc gêm yom nañ Yisu sôm têtñ ñac su, pi gêñ nañ oc hôc asê iñ têtñ têm iñ bu pi Jerusalem ndi. Alic Mak 8:31; ma 9:30. † **10:38:** Yisu ndê yom pi laclhu nañ iñ oc nôm, ma sanğu nañ iñ oc liñ, nañ ñahu sip ñawapac daêsam nañ oc hôc asê iñ.

³⁹ Ma inlu sêsôm, “Aêc, alu atôm.” Goc Yisu sôm, “Yomandô! Amlu oc anôm gêñ sip laclhu tôm aö wanôm, ma alij sanju tôm nanj aö waliñ.

⁴⁰ Magoc aö dec oc wanjaliñ lau sa bu sêndöc aö amanj andô-nga ti amanj gasê-nga, nanj dom. Anötö ti ñadau bu êñjaliñ lau sa bu sêndöc dinanj.”

⁴¹ Têñ ndoc ñgacsêñomi 10 sêñgô yom dau ñawaê, nanj ñac tac ñandê têñ Jems lu Jon.

⁴² Goc Yisu mbwêc ñac sêtêñ in si, ma sôm, “Mac anjalê bu lau sambuc si gôliñwaga sêtoc dau sa têñ ñac si lau, ma ñac si lau bata sêñgwiniñ lau nanj sêmbo ñac ñapu.

⁴³ Tigenj mac anjuc ñac si mêtê dau dom. Mba! Mac nem asa bu ti ñamalac tiwaê yêc Anötö anğô-nga, nanj nem akind mac.

⁴⁴ Aêc! Asa bu ti mac nem ñamalac ñamata-nga, nanj êñgwiniñ dau ma ti mac honj nem ñgac akind ñambwa.

⁴⁵ Nahu bu lêñ dau ti aneñ lêñ. Ñamalac ndê Atu meñ tu bu lau sênem akind in-nga dom. Mba. In meñ bu nem akind lau, ma bu kêñ dau ti da bu nemlhi lau daêsam si sac ñatôp.”

*Yisu kôm ñgac tapec Batimeas ñayham sa
(Mat 20:29-34; Luk 18:35-43)*

⁴⁶ Yisu ti ndê ñgacsêñomi sêñsêlêñ e sêhóc asê malac Jeriko, ma lau toñ atu sêñkuc ñac. Têñ ndoc ñac bu sêhu Jeriko sinj, nanj sêtap ñgac tapec danj sa, nanj ndöc señ ñamakê ma teñ gêñ. In Batimeas, ñgac danj ñaê Timeas ndê atungac.

⁴⁷ Têñ têm in ñgô bu Yisu Nasaret-nga kêsêlêñ mbo señ, nanj gic hu mbwêc yom asê bocdec bu, “Yisu, †Dawid ndê Atu, tamwalô aö!”

⁴⁸ Goc lau daêsam sêhec yom in ma sêsôm bu in nem dôḅ. Magoc in mbwêc ti ḅaḅga, “Dawid ndê Atu, tamwalô aö.”

⁴⁹ Yisu ḅḅô ḅac si yom ma kwê dôḅ kalhac, goc sôm têḅ lau, “Mac asôm têḅ in bu meḅ.” Goc sêta yom têḅ ḅḅac tapec dau ma sêsôm, “Tisa ti atac ḅayham! In ta am bu mweḅ.”

⁵⁰ Goc ḅḅac dau kac ndê ḅakwê andô-ḅḅa baliḅ su yêc nom, ma tisa ḅḅaḅô ma têḅ Yisu gi.

⁵¹ Ma Yisu ndac in, “Am tac whiḅ bu aö wakôm sake têḅ am?” Ma ḅḅac tapec dau sôm, “Kêdôhôn-waga, aö tac whiḅ bu tanôn ḅayham sa.”

⁵² Goc Yisu sôm, “Am ndi! Am nem kêḅ whiḅ aö dec kôm am ḅayham sa.” Ma ḅḅaḅô in tandô ḅawa sa, ma in kêkuc Yisu mbo seḅ.

11

Yisu sôc Jerusalem gi

(Mat 21:1-9; Luk 19:28-40; Jon 12:12-15)

¹ Yisu ti ndê sêḅomi sêḅsêlêḅ sêhêganôn Jerusalem e sêsuḅ sa malac Betani ma malac Betpaci yêc Lôc Olib. Goc Yisu kêkiḅ ndê ḅḅacsêḅom lu,

² ma sôm têḅ in lu, “Asôm malac dindê andi, ma yêc dindê amlu oc atap donki daḅ sa, naḅ sêsô dôḅ kalhac. In donki ḅatu wakuc, naḅ ḅamalac daḅ ndôc ḅahô muḅ su dom. Anḅapwêc su ma akôc sa amêḅ.

³ Ma lau bu sêndac amlu bu bocke ma amlu anḅapwêc donki dau, naḅ asôm têḅ ḅac bu, ‘Pômdau tac whiḅ bu donki dindêc nem in sa ḅasawa sauḅ, goc in oc kêḅ mbu meḅ.’ ”

⁴ Bocdinaŋ dec iŋlu sêsoċ malac dau si ma sêtap donki daŋ sa, naŋ lau sêsoċ dônŋ kalhac seŋ ŋadali k êpiŋ andu daŋ. Iŋlu bu sêŋgapwêc su,

⁵ ma lau ŋatô naŋ sêlhac sêmpin, naŋ sêndac iŋlu, “Amlu akôm sake, dec bu aŋgapwêc donki dau su?”

⁶ Ma iŋlu sêoŋ ŋac si yom tôm Yisu sôm têtŋ iŋlu, dec sêhu donki dau siŋ têtŋ iŋlu.

⁷ Sêwê iŋ sa sêtêtŋ Yisu si, ma sêhu si ŋakwê awê-ŋga sac donki, goc Yisu pi gi ndöc ŋahô.

⁸ Ma lau daêsam sêhê si ŋakwê yêc seŋ. Ma lau ŋatô sêhêako a ŋalaun yêc seŋ ŋamakê ma sêkêtŋ yêc seŋ.

⁹ Lau naŋ sêmuŋ Yisu ti lau naŋ sêŋkuc iŋ, naŋ sêmbwêc “Hosana! Anötö nem mbec ŋgac naŋ meŋ gêm Pômdau aŋgô.

¹⁰ Anötö nem mbec iŋ naŋ meŋ bu puc aban Dawid ndê gôliŋ dônŋ. Hosana têtŋ Anötö lôlôc-ŋga.”

¹¹ Yisu hôc asê Jerusalem, goc sôc lôm dabun ŋabatêmdö gi, ma gêlic gêtŋ sambob naŋ yêc dindê. Magoc ac gi su dec iŋ ti ndê ŋgacsêŋomi 12 sêmbu sêsa malac Betani si bu sêyêc dindê.

Yisu pucbo a kiŋ daŋ (Mat 21:18-19)

¹² Têtŋ bêtêc Yisu ti ndê ŋgac-s êŋomi sêhu Betani siŋ ma sêŋsêlêtŋ sêmbu seŋ, ma gêtŋ yô Yisu.

¹³ Iŋ gêlic a kiŋ daŋ naŋ kalhac ahê, goc têtŋ a dau gi. Têm dinaŋ iŋ têtŋ naŋ a kiŋ sem ŋandô dom, magoc Yisu gêlic bu a dinaŋ ŋalaun kêsôlô su dec kêtŋ bata bu mboe kiŋ ŋandô oc sêŋgalêtŋ. Magoc ŋandô mbasi, iŋ tap ŋalaun ŋambwa sa.

14 Goc in pucho a dau ma sôm, “Lau dan oc sênenj ñandô yêc a dindec tiyham dom.” Ma in ndê ñgacsêñomi sêñgô yom dau.

Yisu soc lau su yêc lôm dabunj
(Mat 21:12-17; Luk 19:45-46)

15 Yisu ti ndê sêñomi sêñsêlêñ si e sêhóc asê Jerusalem, ma sêtêñ lôm dabunj si. Yêc lôm dabunj ñabatêmdö lau sêtidulu gêñ ti semlhi gêñ sêmbo, ma Yisu gic hu soc ñac sêsa awê. In kac lau sêo mone-ñga si tebo sa, ma kac lau nanj sêyob balusi bu lau sênemlhi,* nanj si pôn sa whinj.

16 Ma in gic yao lau bu sêkóc wapa sêtidulu-ñga sôc lôm dabunj ñagamenj tiyham dom.

17 Ma in kêdôhôn lau ma sôm, “Sêto Anötö ndê yom yêc bocdec bu, ‘Aö nenj andu gic waê bu lau akêñ gameñ honj sêteñ mbec sêmbo-ñga.’ Mac anjyalê yom dau, ma bocke dec mac akôm Anötö ndê andu ti lau kanj si gameñ?”

18 Tinambu dabunjsiga atu-tu ma lau nanj sêndôhôn yomsu, nanj sêñgô ñawaê pi gêñ nanj Yisu kôm, ma sêñyalê bu lau sambob sêhêdaê tu in ndê yom-ñga. Tu dinan-ñga dec sêtôc Yisu, ma sêñsalê lêñ bu sêndic in ndu.

19 Yisu ti ndê ñgac-sêñomi sêmbo Jerusalem e ac gi sip, dec sêmbu sêsa si.

Yom pi lêñ dakêñ whinj ti dateñ mbec-ñga
(Mat 21:20-22)

20 Ñagalanjsê bêbêc Yisu ti ndê ñgacsêñomi sêñsêlêñ bu sêmbu sêtêñ Jerusalem sêndi, ma sêhóc

* 11:15: Alic yom ñapu-ñga (footnote) yêc Mat 21:12.

asê a kiŋ naŋ Yisu pucbo. Naç sêlic bu a dau mbac, ŋasaŋgac ti ŋawakac hoŋ tibasô.

²¹ Ma Pita gauc gêm Yisu ndê yom, dec sôm têŋ iŋ, “Kêdôhônŋwaga, lic a kiŋ naŋ am pucbo, naŋ mbac su.”

²² Goc Yisu ô yom ma sôm têŋ ŋac, “Akêŋ whiŋ Anötö.

²³ Aö wasôm yomandô têŋ mac, bu asa naŋ bu sôm têŋ lôc daŋ bu, ‘Puc daôm sa ma sip gwêc ŋalôm ndi,’ ma atac lu-lu dom magoc kêŋ whiŋ bu Anötö oc kôm yom dau ŋandô sa, dec gêŋ dau oc ŋandô sa.

²⁴ Boc-dinaŋ aö bu wasôm têŋ mac bu gêŋ bocke naŋ mac bu atêŋ Anötö bu kêŋ têŋ mac, naŋ akêŋ whiŋ bu mac akôc su, ma aö wasôm yom ŋandô, iŋ oc kêŋ têŋ mac.

²⁵⁻²⁶ Ma têŋ ndoc mac bu atêŋ mbec, ma bu gauc nem lau naŋ sêkôm sac têŋ mac, naŋ goc asuc ŋac si sac kwi. Ma mac nem Damam naŋ mbo undambê, oc suc mac nem sac kwi bocdinaŋ.”

*Gêndac pi Yisu ndê ŋaclai ŋahu
(Mat 21:23-27; Luk 20:1-8)*

²⁷ Yisu ti iŋ ndê ŋgacsêŋomi sêhôt asê malac Jerusalem tiyham ma sêtêŋ lôm dabuŋ si. Yisu kêsêlêŋ mbo lôm dabuŋ ŋabatêm-ndö, ma dabuŋsiga atu-tu ti kêdôhônŋwaga yomsu-ŋga ma lau bata sêtigasuc iŋ.

²⁸ Ma sêndac iŋ, “Am kôc ŋaclai yêc nde, bu kôm gêŋ hoŋ naŋ am kôm? Asa kêŋ têŋ am?”

²⁹ Goc Yisu sôm têŋ ŋac, “Gêŋ ŋamata-ŋga aö wakêŋ gêndac daŋ têŋ mac. Mac bu aö aneŋ yom, dec wasôm aneŋ ŋaclai ŋahu asê têŋ mac.

30 Asa kêñ ñaclai têtñ Jon dec in kêtñ lau? Anötö kêñ ñaclai têtñ in, me mba? Asôm têtñ aö.”

31 Ñac sem yomgalôm pi Yisu ndê gëndac, ma sêsôm têtñ dau, “Yac bu dasôm bu Anötö kêñ ñaclai têtñ Jon, goc Yisu oc ndac yac, “Tu sake-nga mac akêtñ whin Jon dom?”

32 Magoc yac bu dasôm bu Jon kêtñ lau kêtñuc ñamalac nom-nga si gauc ñambwa, goc lau oc sêlic yac sac.” Ñac sêtñyalê bu lau daêsam sêlic Jon bu propet dan, dec sêtöc dau.

33 Bocdinañ sêsôm têtñ Yisu, “Yac añyalê dom.” Ma in sôm têtñ ñac, “Bocdinañ aö wasôm aneñ ñaclai ñahu asê têtñ mac dom.”

12

Yom gôlin pi lau sêyob ôm wain-nga (Mat 21:33-46; Luk 20:9-19)

1 Ma in gic hu yom gôlin dan ma sôm têtñ lau bata Israel-nga dinañ, “Ñgac dan sô ôm wain-nga dan. In sô tun sa, kêmasañ gameñ tu lau sêmasañ wain ñakwi-nga, ma kwê andu balin dan bu lau sêlhac ma sêtup lau kan. Tinjambu in kêñ ôm dau têtñ lau ñatô sêyob, ma kölhö gi mbo gameñ dan.

2 Têtñ têtñ sêndic wain ñandô sa-nga, nañ ñadau kêtñ ñgac akin dan têtñ lau sêyob ôm-nga, tu bu sêkên wain ñandô ñatô têtñ in.

3 Tigeñ ñac sêlô in dôn, sic in ñamlic ñandê, ma sêkên in kölhö amba sawa gi.

4 Goc ñadau kêtñ ñgac akin dan tiyham, tigeñ ñac sic in pi ñagôlôn, ma sêkôm mêtê sac têtñ in.

⁵ Tinjambu njadau kêkin njac titö-nga, magoc njac sic inj ndu. Ma inj kêkin lau daêsam tiyham, ma njac sic njatô njamlic njandê, ma sic njatô ndu.

⁶ Tinjambu njac tigenj mbo, nanj njadau ndê atungac, nanj inj tac whinj ndu andô. Goc njadau kêkin ndê atu dau têj njac gi, ma gauc gêm têj dau, 'Lau nanj sêyob anenj ôm, nanj oc sêtoc anenj atungac dindec sa.'

⁷ Tigenj têj têm njadau ndê atu hóc asê, nanj lau sêyob ôm-nga sêsôm têj dau, 'Njac dinanj inj njadau ndê atungac nanj oc wêkainj ôm dindec ti ndê gêj lêngsêm. Bocdiananj dandic inj ndu ma dakôc ôm dindec su ti yac neñ.'

⁸ Ma sêkôc atungac, sic inj ndu ma sêtuc inj sa awê gi."

⁹ Goc Yisu ndac, "Mac gauc gêm bu ôm njadau oc kôm sake têj lau nanj sêyob inj ndê ôm? Inj oc menj ma ndic njac ndu, ma kêj ôm dau têj lau njatô sêyob.

¹⁰ Gauc nem yom nanj sêto yêc bocdec bu, '*Hoc nanj lau sêkwê andu-nga sêtec, nanj kwahic ti hoc njamata-nga yêc andu dau.*

¹¹ *Pômdau kôm gêj dau, ma yac alic njayham.'* Mac asam yom dau su, me?"

¹² Têj dinanj lau bata Israel-nga sênjalê bu Yisu sôm yom gôlinj dau hêganônj njac, dec sênjalê lêng bu sêkôc inj dôj. Magoc sêtoc lau tonj atu nanj sêmbo sêwhinj Yisu, ma tu dinanj-nga sêhu inj sinj ma sêlhö si.

*Lau bu sêtim Yisu pi yom takis-nga
(Mat 22:15-22; Luk 20:20-26)*

¹³ Tinjambu lau bata dinanj sênjalê lêng bu sêtim Yisu bu sôm yom so danj. Njac sênkinj lau Palêsai njatô

sêwhin lau Israel-nga ñatô nan sêpuc Herod ma lau Rom-nga si gôlin dön, nan sêtêñ Yisu si.

14 Ñac sêhóc asê in ma sêsôm, “Kêdôhôn-waga, yac aňyalê bu am ñgac sôm yom ñandô-nga. Am gauc gêm lau si waê dom, ma toc ñac hoñ sa ñalêñ tigen. Ma am kêdôhôn Anötö ndê lêñ têñ lau kêkuc yom ñandô solop. Kwahic dec yac bu andac am bu in solop bu yac dakêñ takis t êñ †Sisa, me mba? Yac oc danemlhi takis, me mba?”

15 Yisu ñgô yom dau, tigen in kêyalê bu ñac gauc gêm bu sêtin in, dec sôm, “Tu sake-nga mac bu atim aö? Akôc mone silba dan ma atôc têñ aö.”

16 Goc sêkêñ mone dan têñ in, ma in ndac ñac, “Asa ndê ñagatu ti ñaê yêc mone dindec?” Ma sêo yom ma sêsôm, “Sisa ndê.”

17 Dec Yisu sôm, “Bocdinañ atoc Sisa sa ña gêñ nan gic in ñawaê, ma atoc Anötö sa ña gêñ nan gic in ñawaê.” Ñac sêñgô Yisu ndê yom dau, ma sêhêdaê tu in ndê gauc-nga.

Lau Sadiusi bu sêtin Yisu pi yom datisa akêñ lau batê-nga

(Mat 22:23-33; Luk 20:27-38)

18 Ma lau †Sadiusi ñatô sêtêñ Yisu si, bu sêkêñ gêndac dan têñ in. Ñac lau Israel si ton dan, nan sêkêñ whin dom bu lau batê oc sêtisa tiyham.

19 Ma ñac sêndac in bocdec bu, “Kêdôhôn-waga, Moses to yac neñ yomsu dan bocdec bu. Ñgac dan bu ndê dôwa nem awhê sa ma bu mbac ndu ma balêkoc mbasi, nan ñgac dau oc nem dôwa ndê awhê sawa, ma kwê balêkoc asê tu dôwa-nga.

²⁰ Têñ ndoc dan asidôwai 7 sêmbô. Ngac ñamata-nga gêm awhê sa, magoc mbac ndu, ma balêkoc mba.

²¹ Goc in asi, ngac tilu-nga, gêm awhê sawa dau, magoc mbac ndu ma balêkoc mba. Ngac titö-nga bocdinañ,

²² ma asidôwa hale bocdinañ, hon sem awhê sawa dau sa, magoc sêmbac ndu, ma balêkoc mba. Ma tiñambu awhê dau mbac ndu.

²³ Kwahic dec yac bu andac am bocdec bu. Lau batê bu sêtisa tòm lau ñatô sêsôm, dec awhê dau oc ti asidôwa asa ndê awhê? Bu asidôwai 7 dinañ hon sem awhê tigeñ dinañ su têtñ ndoc sêmbô tali.”*

²⁴ Ma Yisu sôm têtñ ñac, “Mac akôc gauc so, bu mac aňyalê Anötö ndê yom ti in ndê ñaclai dom.

²⁵ Têtñ têtñ lau batê sêtisa, nañ lau oc sênem dau dom. Ñac oc sêmbô sêtôm aňela undambê-nga.

²⁶ Ma yom dan tiyham têt asê bu lau batê oc sêtisa. Mac asam su yêc Moses ndê buku. Têtñ ndoc Moses gêlic ya golom a dan, nañ Anötö sôm têtñ in bu, ‘Aö Abraham ndê Anötö, Aisak ndê Anötö ma Jakob ndê Anötö.’

²⁷ Lau batê bu sêtisa dom, dec tu sake-nga Anötö sam dau bu lau tö dinañ si Anötö? In lau batê si Anötö dom, in lau tali si Anötö. Mac nem gauc in so sambuc.”

Yomsu ñamata-nga

(Mat 22:34-40; Luk 10:25-28)

²⁸ Kêdôhônwaga yomsu-nga dan kalhac whin lau nañ sêkên danğa Yisu ma lau Sadiusi si yom, ma in

* **12:23:** Lau Sadiusi gauc gêm bu ñac si gêndac dau têt asê bu lau batê oc sêtisa tiyham dom.

gêlic bu Yisu ô lau Sadiusi si yom ñapep. Bocdinañ inñ ndac Yisu, “Anötö ndê yomsu bocke ti yomsu ñamata-ñga?”

²⁹ Ma Yisu sôm, “Yomsu ñamata-ñga nañ hóc gêlêc yomsu honñ nañ bocdec, ‘Mac lau Israel-ñga anñgô! Pômdau yac neñ Anötö inñ Pômdau tigerñ.’

³⁰ *Atac whinñ Pômdau am nem Anötö ti am nem ñalôm sambuc, ti gatôm sambuc, ti gauc sambuc, ma ti licwalô sambuc.’*

³¹ Ma yomsu tilu-ñga bocdec yêc, ‘Atac whinñ lau meñpañ am-ñga, tôm am atac whinñ am daôm.’ Yomsu lu dinañ sêhóc gêlêc yomsu honñ su.”

³² Goc kêdôhônñwaga yomsu-ñga dau sôm têtñ Yisu, “Kêdôhônñwaga, am sôm solop. Yomandô, Anötö tigerñ mbo, ma anötö ñandô danñ mbo dom.

³³ Ma yac bu atac whinñ A nôtö ti neñ ñalôm sambuc, ti gauc sambuc, ma ti licwalô sambuc, ma yac bu atac whinñ lau meñpañ yac-ñga tôm yac atac whinñ yac daunñ, nañ hóc gêlêc bu yac dakêñ wata ti da pi ya ndi, me bu dakêñ gêtñ ñatô ti da.”

³⁴ Yisu gêlic bu ñgac dau ô yom ti gauc ñayham, dec sôm têtñ inñ, “Êmkuc gauc ñayham dinañ dec am oc tôm bu mbo Anötö ndê gôliñ ñalôm.”

Yisu sôm yom dinañ, ma tiñambu lau sêtöc bu sêkêñ gêndac têtñ inñ tiyham.

Yisu kêsahê lau si gauc pi Mesaya

(Mat 22:41-46; Luk 20:41-44)

³⁵ Yisu kêdôhônñ lau mbo lôm dabuñ ñamakê, ma ndac ñac, “Bocke ma lau †Skraib sêsam Mesaya bu Dawid ndê Atu?”

³⁶ Dawid dau hoc yom asê tôm Ñalau Dabuñ puc inñ dôñ, ma to yom pi Mesaya bocdec bu, ‘Anötö

sôm têḡ aneḡ Pômdau, “Am ndöc aö amanḡ andô-ḡga e nditôm aö wakêḡ nem ḡacyo sêsôc am ḡahim ḡapu.”

³⁷ Dawid dau sam Mesaya bu iḡ ndê Pômdau, ma bocke dec lau sêsam iḡ bu Dawid ndê Atu?” Ma lau hoḡ sêḡḡô Yisu ndê yom ti atac ḡayham atu.

*Yisu ndê puc pi lau Skraib si mêtê sac
(Mat 23:1-7; Luk 20:45-47)*

³⁸ Ma Yisu kêdôhôn lau ma sôm, “Ayob daôm ḡapep bu anḡkuc lau Skraib si ḡêbôm dom. ḡac sêsôc ḡakwê baliḡ ma sêḡsêlêḡ sêmbo malac lôm, bu ḡac atac whiḡ bu lau sêtoc ḡac sa ma sêhê mwalêc ḡac.

³⁹ ḡac atac whiḡ bu sêndöc mala ḡamata-ḡga yêc lôm wê-ḡga, ma sêndöc lau tiwaê si mala têḡ ndoc sêneḡ mwasinḡ.

⁴⁰ Yêc lau hoḡ anḡḡô-ḡga lau dau sêteḡ mbec baliḡ. Magoc têḡ ndoc lau sêlic ḡac dom, naḡ sêḡsau lauwhê sawa bu sêḡḡaho ḡac si andu su. Anötö oc êmatôc ḡac, ma kêḡ ḡagêyô sac sambuc têḡ ḡac.”

*Awhê tuc daḡ kêḡ da daḡḡe
(Luk 21:1-4)*

⁴¹ Tiḡambu Yisu ndöc sic ndöc lôm dabuḡ ḡabatêmdö kêpiḡ apa naḡ lau sêkêḡ si da sip-ḡga, ma tahê lau hoḡ naḡ sêkêḡ si da sip apa dau. Lau ti lêlôm daêsam sêkêḡ awa atu.

⁴² Tigeḡ awhê tuc ḡalôm sawa daḡ meḡ ma kêḡ awa sauḡ lu gitôm wan toea lu sip apa da-ḡga.

⁴³ Goc Yisu ta ndê ḡac-sêḡnomi sêmeḡ ma sôm, “Yomandô, aö wasôm têḡ mac bu yêc Anötö anḡḡô-ḡga awhê tuc ḡalôm sawa dindec kêḡ da naḡ hôc ḡêlêc lau hoḡ si da su.

44 Nahu bu lau ti lélôm honj sêkêñ si da, magoc ñac si awa daêsam gacgen yêc ñac-ñga. Magoc awêhê dindec inj awêhê ñalôm sawa, ma inj kêñ ndê gêñ honj ti da.”

13

Yisu sôm yom pi lôm dabuñ Jerusalem-ñga
(Mat 24:1-2; Luk 21:5-6)

1 Têñ ndoc Yisu bu hu lôm dabuñ ñagamenj sinj, nañ inj ndê ñgacsêñom dañ sôm têñ inj, “Kêdôhônwaga, lic hoc atu-tu ma andu ñayham kêlêc nañ sêkwê sa sêlhac dec.”

2 Magoc Yisu ô yom ma sôm têñ inj, “Am lic andu atu-tu ti lôm dabuñ dindec! Aô wasôm têñ am, bu tiñambu ñacyo oc sêseñ hoc atu-tu honj dindec su e hoc dañ oc ndöc hoc dañ ñahô tiyham dom.”

Gêñ wapac têm ñambu-ñga-ñga
(Mat 24:3-14; 10:17-22; Luk 21:7-19)

3 Ñac sêsa sêtêñ Lôc Olib si, ma tiñambu Pita, Jems, Jon ma Andru tawasê sêtêñ Yisu si ma sêndöc anğô têñ lôm dabuñ yêc malac Jerusalem. Ma ñac sêndac inj bocdec bu,

4 “Sôm têñ yac bu ñawapac nañ am sôm yom pi, nañ oc hôc asê Jerusalem têñ têm bocke, ma gêñ sake oc kêñ puc yac bu têm dau meñ kêpiñ?”

5 Goc Yisu sôm têñ ñac, “Ayob daôm ñapep bu lau dañ sêñsau mac dom.

6 Bu lau daêsam oc sêmeñ sênem aô anğô ma sêsôm, ‘Aô Mesaya dauñ dec,’ ma oc sêñsau lau daêsam.

7 Ma têñ ndoc mac anğô ñawaê bu lau sic sinj têñ dau me sêmasañ dau tu sêndic sinj-ñga, nañ asö

dom. Bu gêñ honñ dinanñ gic waê bu menñ sa, m agoc têm ñambu-ñga yêc dôñ yêc.

⁸ Kinñ nom-ñga oc sêkêñ kisa dau, ma lau gameñ danñ oc sêndic sinñ têtñ lau gameñ danñ. Tiyhò oc nem yêc gameñ honñ, ma tóbôm oc sa. Gêñ honñ dinanñ oc ndic hu ñawapac têm ñambu-ñga-ñga, gitôm awhê nanñ kêsahê balêkoc tunñ inñ ma gêñ dau gic hu ñandê atu nanñ inñ oc hóc tu kóc balêkoc-ñga.

⁹⁻¹⁰ “Gêñ ñamata-ñga lau oc sêhoc ñawaê ñayham asê têtñ lau sambob, ma têtñ dinanñ têm ñambu-ñga oc menñ hóc asê. Ayob daôm ñapep. Lau oc sêwê mac atêtñ lau sêmatôc yom-ñga andi, ma sêhi mac ña sô yêc lôm wê-ñga. Tu aô-ñga dec lau oc sêkêñ mac alhac gôlinwaga ti kinñ anğô-ñga, magoc ndoc dinanñ ti têm bu mac ahoc yom ñandô asê têtñ ñac.

¹¹ Têtñ têm nanñ sêkôc mac dôñ ma sêwê mac atêtñ lau sêmatôc mac-ñga andi, nanñ ahêgo daôm tu yom asôm-ñga dom. Asôm yom nanñ Anötö oc kêtñ têtñ mac têtñ ndoc dinanñ, bu mac daôm oc asôm yom dom, Ñalau Dabuñ oc sôm.

¹² “Têtñ ndoc ñawapac-ñga dinanñ, lau nanñ sêkêñ whinñ dom oc sêhoc si asidôwai sêkêñ whinñ aô-ñga asê bu sêndic ñac ndu, ma dambai oc sêkôm têtñ atui boc-dinanñ. Balêkoc oc sêli dau sa têtñ damba ti dindai, ma sêkêñ ñac sêtêtñ lau bu sêndic ñac ndu.

¹³ Lau honñ oc sêtec mac tu aô neñ ñaê-ñga. Magoc asa nanñ bu lhac ñanñga ma hu aô sinñ dom e ndê têm pacndê, nanñ oc tap Anötö ndê mwasinñ nem inñ si-ñga sa.”

*Ñawapac gameñ Judia-ñga
(Mat 24:15-28; Luk 21:20-24)*

¹⁴ “Gêñ sac sambuc nañ oc kôm gameñ tisac, nañ lau oc sêkêñ lhac gameñ nañ gic in ñawaê dom. (Asa nañ sam yom dindec, nañ kôc gauc ñapep, bu ñahu yêc sinj dau.) Mac lau asa nañ ambo gameñ Judia-ñga ma alic gêñ dau, nañ hoñ alhö api gameñ lôc-ñga andi.

¹⁵ Alhö ñagahô ma gauc nem mac nem gêñ dañ dom. Lau nañ sêñwhañ dau sêndöc andu ñasactô, nañ sêsôc andu ñalôm bu sêkôc si gêñ dañ tôhôn dom.

¹⁶ Ma ñac nañ sêmbo ôm, nañ bocdinañ. Sêkac dau kwi bu sêkôc si gêñ ñatô dom.

¹⁷ Oyaê. Lauwhê tidaê, ma ñac nañ sêkêñ su têtñ balêkoc, nañ oc sêtap ñawapac atu sa têtñ têtñ dinañ.

¹⁸ Ateñ mbec bu gêñ dinañ tap mac sa têtñ ndoc uhô-ñga dom.

¹⁹ Ñahu bu ñawapac ñandô nañ bu sa têtñ têtñ dinañ, nañ oc hóc gêlêc ñawapac hoñ nañ sêhóc asê nom têtñ têtñ nañ Anötö kêtñ undambê ti nom e kwahic dec, ma tiñambu oc sa bocdinañ tiyham dom.

²⁰ Magoc Pômdau oc kêtñ ndoc dinañ tiapê tu bu nem lau nañ in kêtñaliñ sa su, nañ sa-ñga. Bu mba, goc lau hoñ oc sêñiñga.

²¹ “Têtñ ndoc dinañ ñgac dañ bu sôm têtñ mac bu, ‘Alic, Mesaya dau dindec,’ me ‘Alic, Mesaya dau dindê,’ nañ akêtñ whiñ ñac dom.

²² Lau nañ sêñsau bu ñac Mesaya, ma propet tasan oc sêmeñ ma sêkôm gêñ dalô ti gêñ atu-tu bu sêñsau lau. Ma ñac oc sêñsahê bu sêtim lau nañ Anötö kêtñaliñ ñac sa, nañ sêwhiñ.

²³ Aö gakêtñ puc mac gwanañ, ma bocdinañ ayob daôm ñapep.”

*Namalac ndê Atu ndê bêc mbu men-nga
(Mat 24:29-36; Luk 21:25-33)*

24 Ma Yisu sôm, “Ndoc ñawapac-nga dinañ oc pacndê, ma tiñambu lau oc sêlic gêñ dalô atu-tu. Ac oc nem ganduc ma ayô oc ñawê tiyham dom.

25 Ma tata oc sêpen akêñ umboñ, ma gêñ ti ñaclai nañ sêlhac umboñ oc wiwic sa.

26 Ma tiñambu lau oc sêlic Ñamalac ndê Atu men ndöc dao ñahô ti ndê ñaclai ma ñawasi atu.

27 Ma inñ oc êñkinñ ndê anjela sêsa sêtêñ nom ñabatiñ ti undambê ñabatiñ hoñ sêndi, bu sêndic lau nañ inñ kêyaliñ ñac sa su, nañ sa.

28 “Gauc nem a lañ. Têñ ndoc mac alic ñalaun wakuc bu léc, nañ mac anjyalê bu ndoc ac-nga men kêpiñ.

29 Ma bocdinañ têtñ ndoc mac alic gêñ nañ aö gasôm yom pi, nañ hóc asê, dec anjyalê bu Ñamalac ndê Atu ndê bêc mbu men-nga menñ kêpiñ su, gitôm inñ menñ kalhac gatam.

30 Yomandô! Lau têtñ dinañ-nga oc sêniñga dom e gêñ hoñ dinañ hóc asê.

31 Undambê ti nom oc niñga, magoc aneñ yom oc niñga dom. Gêñ hoñ oc ñandô sa tôm aö gasôm.”

*Lau dañ sêñyalê Yisu ndê bêc mbu men-nga dom
(Mat 25:13-15)*

32 Ma Yisu sôm, “Lau dañ sêñyalê bêc me acgatu nañ Ñamalac ndê Atu oc mbu menñ, nañ dom. Anjela undambê-nga sêñyalê dom, Anötô ndê Atu kêyale dom, Damañ tawasê kêyale.

33 Bocdinañ anem ali ma ayob daôm ñapep! Mac am gauc têtñ nañ bêc ñambu-nga dau oc menñ sa.

³⁴ Gitôm andu ñadau dan nañ bu sa ndi lic gamen ñatô. In hu ndê andu siñ ma kêñ in ndê lau akind sêwêkain si gwelenj têtêtêñ. Ma in oc sôm têtêñ ñgac yob gatam-nga, bu in nem ali ma tatinj gamen ñapep e in mbu menj.

³⁵ Bocdinañ anem ali, bu mac anyalê ndoc nañ andu ñadau oc mbu menj, nañ dom. In oc hóc asê têtêñ telha me timaninhu, me dalec tañ, me bêbêc ganduc, nañ mac anyalê dom.

³⁶ Ayob daôm ñapep, mboe in oc mbu menj ñagahô, ma tap mac sa ayêc bêc ayêc.

³⁷ Yom nañ aô gasôm têtêñ mac, nañ dec wasôm têtêñ lau hoñ bocdinañ. Anem ali!”

14

Sêkic yom bu sêndic Yisu ndu

(Mat 26:1-5; Luk 22:1-2)

¹ Lau Israel si †Mwasinj Pasowa ti †Mwasinj Bolom Yist Mba-nga ñandoc menj kêpinj, ma bêc lu yêc dônj yêc. Ma dabunj-siga atu-tu ti lau nañ sêndôhônj yomsu-nga sêñsalê lêt danj bu sêkôc Yisu dônj gelec ma sêndic in ndu.

² Tigenj sêhêgo dau ma sêsôm, “Dakôm têtêñ Mwasinj Pasowa-nga ñandoc dom, mboe lau daêsam nañ sêmbo Jerusalem tu om atu Pasowa-nga, nañ oc sêlic ma sêli dau sa.”

Awhê danj gêm oso Yisu

(Mat 26:6-13; Luk 7:36-50; Jon 12:1-8)

³ Têtêñ têtêñ dinañ Yisu mbo malac Betani, ma gêt gêt ndôc whinj ñgac danj ñaê Saimon. Munj-nga in ñgac ti gêm bac leprasi. Yisu ndôc tebo ma awhê danj menj, nañ kôc bu ñamalu ñayham ñaôli atu sip kac

dan. In kac gêñ dau sa, ma kêc gêñ malu dau pi Yisu ndê ñagôlôn.

⁴ Lau ñatô sêlic dec tac ñandê têt awê dau, ma sêsôm, “Tu sake-nga in kêyaiñ gêñ ñamalu dinañ?”

⁵ Gitôm bu dakêt têt lau sênemlihi ma datap awa atu sa, ma dakêt têt lau ñalôm sawa. Ñaôli ñau oc hôc gêlêc ñaôli tu gwelen yala sambuc-nga su.” Ma sêhec yom in ñalên sac.

⁶ Magoc Yisu sôm, “Ahu in sin ma akêt ñawapac têt in dom. In kôm gêñ ñayham solop têt aô.

⁷ Lau ñalôm sawa oc sêmbo sêwhiñ mac ñapañ, ma bocdinañ dec têt bocke mac bu atac whiñ, nañ oc tôm bu mac anem ñac sa. Tigen aô oc wambo wawhiñ mac ñapañ dom.

⁸ Awhê dindéc gitôm bu êmwasiñ aô ñalên dinañ, dec kôm. In kêc gêñ ñamalu pi aô, dec tôm in kêmasañ aô neñ ñamlic gwanañ tu sêñsuhun aô-nga.

⁹ Yomandô aô wasôm têt mac, bu tiñambu lau oc sêhoc ñawaê ñayham asê yêc gameñ hoñ, ma têt dinañ ñac oc sêsôm yom pi awhê dindéc ma lau oc gauc nem in.”

Judas sôm tidôn bu hoc Yisu asê

(Mat 26:14-16; Luk 22:3-6)

¹⁰ Têt ndoc dinañ Judas Iskeriot, ñgacsêñomi 12 si dan, têt dabunsigna atu-tu gi ma sôm bu in oc hoc Yisu asê têt ñac.

¹¹ Ñac sêngô in ndê yom ti atac ñayham, ma sêsôm tidôn bu sênemlihi in. Bocdinañ in kêsalê lêt tu bu hoc Yisu asê-nga.

Yisu ndê ñgacsêñomi sêmasañ Mwasiñ Pasowa-nga
(Mat 26:17-19; Luk 22:7-13)

12 Têñ Mwasinj Bolom Yist Mba-nga ñabêc ñamata-nga, bêc nanj lau Israel-nga sic domba Pasowa-nga ndu, nanj ñgacsêñomi sêsôm têtñ Yisu bu, “Am tac whinj bu yac amasanj Mwasinj Pasowa bu am nenj whinj yac-nga yêc nde?”

13 Dec Yisu kêkinj ndê ñgacsêñom lu ma sôm têtñ injlu, “Asôc malac Jerusalem andi, ma amlu oc atap ñgac danj sa nanj kêbalañ bu lôñ danj. Awhinj inj atêtñ inj ndê ñadau ndê andu andi.

14 Ma asôm têtñ andu ñadau, ‘Alu mba kêdôhônjwaga ndac am tu andu ñalôm ñaclen-nga, bu inj ti ndê ñgacsêñomi bu sênenj Mwasinj Pasowa-nga yêc am nem andu.’

15 Ma inj oc tôc ñalôm atu danj yêc andu dau ñahôn-nga têtñ amlu. Tebo ti gêtñ honj tu yac danenj Mwasinj Pasowa-nga yêc ñalôm dau, goc amasanj gêtñ yêc dinanj.”

16 Goc sêñom lu dinanj sêsôc malac si, ma sêtap gêtñ honj sa tôm Yisu sôm su, ma sêmasanj Pasowa.

*Yisu sôm asê bu ñgac danj oc hoc inj asê
(Mat 26:20-25; Luk 22:21-23)*

17 Têtñ ac gi su Yisu ti ñgacsêñomi 12 sêtêtñ andu dau si.

18 Ñac sêndöc ti senj gêtñ sêmbo, ma Yisu sôm, “Yomandô aô wasôm têtñ mac, bu mac nem danj oc hoc aô asê. Ñgac dau kwahic dec ndöc ma gêtñ gêtñ whinj aô.”

19 Yom dau kôm ñac sêsö, ma ñalôm ñawapac atu, ma ñac tigenj-tigenj sêsôm têtñ inj, “Mboe aô, a? Mba!”

20 Goc inj sôm têtñ ñac, “Ñgac dau inj mac lau 12 nem danj, ma kwahic dec alu anj gêtñ sip pele tigenj.

21 Gêñ dau oc ñandô sa pi Ñamalac ndê Atu, tòm yom nañ sêto yêc. Tigen ñgac nañ hoc aô asê, nañ oc tap ñawapac atu sa, ma tu dinañ-nga in dinda bu kôc in dom, dec oc ñayham.”

*Yisu gic hu Mwasiñ Dabuñ
(Mat 26:26-29; Luk 22:15-20)*

22 Têñ têm ñac señ gêñ sêmbo, nañ Yisu kôc bolom, gêm mbec, pô kôc-kôc, ma gic sam têt ñac. Ma in sôm, “Akôc sa loc, aô neñ ñandô dau dindéc.”

23 Ma in kôc laclhu wain-nga dan ma gêm danje, goc kêñ têt ñac ma ñac hoñ sênôm.

24 In sôm têt ñac, “Aô neñ dac wamatiñ pwac-nga dau dec, nañ wakêc siñ tu lau daêsam-nga.

25 Yomandô aô wasôm têt mac bu aô oc wanôm wain tiyham dom e Damañ ndê gôliñ meñ sa tiawê, ma têt ndoc dinañ aô wanôm tiyham.”

26 Tiñambu ñac sem wê dan, ma sêlhô sêsa sêtêt Lôc Olib si.

*Yisu sôm bu Pita oc sêc in ahuc
(Mat 26:31-35; Luk 22:31-34)*

27 Ma Yisu sôm têt ñac, “Mac hoñ oc ahu aô siñ, tòm yom nañ sêto yêc bocdec bu, ‘Aô oc wasen ñgac yob domba-nga, ma domba oc sêlhô babalip.’

28 Magoc tiñambu aô watisa tiyham, ma wamun mac watêt gameñ Galili-nga wandi.”

29 Dec Pita sôm têt in, “Ñac hoñ bu sêhu am siñ, tigen aô wahu am siñ dom.”

30 Ma Yisu ô yom ma sôm, “Aô wasôm yomandô bu ôbwêc dau dindéc am oc sêc aô ahuc tidim tö su, goc dalec oc tañ tidim lu-nga.”

31 Tigen Pita sôm yom ti ñanğa, “Mba! Gitôm sêndic aõ ndu wawhiñ am, aõ oc wasêc am ahuc dom.” Ma ñac honj sêsôm yom kainj tigenj.

*Yisu tenj mbec mbo ôm Getsemani
(Mat 26:36-46; Luk 22:39-46)*

32 Ñac sêsa si e sêhóc asê ôm †olib-ñga danj, ôm nanj sêsam bu Getsemani, ma Yisu sôm têñ ndê ñgacsêñomi, “Andöc dec ma aõ waterj mbec.”

33 Goc inj kôc Pita, Jems ma Jon sêwhiñ inj si, ma sêhu ñgacsêñomi ñatô siñ. Têñ ndoc dinanj Yisu ndê ñalôm ñawapac atu ma inj pô sim dau ñandô.

34 Inj sôm têñ ñac, “Aõ neñ ñalôm kêsahê ñawapac atu, kêpiñ bu oc wambac ndu. Mac andöc dec ma anem ali.”

35 Goc inj hu ñac siñ ma sa ñasawa saunj gi. Inj hu dau sip nom gi ma tenj mbec, bu nditôm goc Anötö nem inj sa bu êñlêc têm hóc ñandê-ñga nanj oc hóc asê inj.

36 Inj sôm, “Damanj, O Damanj, am gitôm bu kôm gêñ honj. Kôc laclhu ñawapac-ñ ga dindec su yêc aõ. Magoc êmkuc aõ neñ atac whiñ dom, kôm tôm am daôm nem atac whiñ bu kôm.”

37 Inj tenj mbec su, dec mbu gi ma tap sa bu ñgacsêñomi sêyêc bêc sêyêc. Goc inj unj ñac sa ma sôm têñ Pita, “Saimon, bocke dec am yêc bêc? Am gitôm dom bu nem ali tôm acgatu ñasawa tigenj, a?”

38 A nem ali ma atenj mbec bu lêtôm tap mac sa dom. Mac nem gatôm licbalê, tigenj ñamlic kwapac.”

39 Goc Yisu sa gi, ma tenj mbec tigenj dinanj tiyham.

40 Pacndê, goc in mbu gi ma gêlic ñac sêyêc bêc, bu ñac tandô hê ñac sa ñandô. Ma ñac sêpônda yom tu sêsôm têt in-nga.

41 Goc in gi ma têt mbec tidim tö-nga. Ma têt ndoc in mbu têt ñac tiyham, nan in sôm, “Tu sake-nga mac ayêc bêc ti aŋwhaŋ daôm ñapaŋ? Gitôm! Ndoc meŋ hóc asê su bu sêhoc Ñamalac ndê Atu asê ma sêkêt in sip lau sac amba.

42 Atisa ma dandi! Alic ñac nan hoc aö asê dec meŋ su.”

Sêkôc Yisu dôt

(Mat 26:47-56; Luk 22:47-53; Jon 18:3-11)

43 Yisu sôm yom dinaŋ mbo, ma Judas, ñgacsêñomi 12 si dan hóc asê whin lau daêsam nan sêhóc bien ti sijn. †Dabuŋsiga atu-tu ti kêdôhônwaga yomsu-nga ma lau bata sêñkin lau ton dinaŋ sêwhin Judas sêmeŋ.

44 Judas kêt puc lau d au gwanan su, ma sôm, “Ñgac nan mac aŋsalê, nan aö oc waŋgutô in bu watôc in asê têt mac. Akôc in dôt ma akêt lau sêyob in, goc awê in sa andi.”

45 Bocdinaŋ têt ndoc Judas hóc asê, nan in têt Yisu solop gi ma sôm, “Kêdôhônwaga,” ma ñgutô in.

46 Dec lau nan sêwhin Judas, nan sêkôc Yisu dôt.

47 Yisu ndê lau sêlhac sêmpin in, ma ñac si dan puc ndê bien sa ma pa dabuŋsiga atu ndê ñgac akin ndê danjalaun dan su.

48 Goc Yisu sôm, “Bocke dec mac akôc bien ti gêt sijn-nga ma asa amêt bu akôc aö dôt gitôm ñgac kan dan?

49 Tôm bêc hon aö gambo gawhin mac ma kadôhôn lau yêc lôm dabuŋ ñabatêmdö, magoc

mac akôc aö dôḡ dom. Tigenḡ gêḡ naḡ mac akôm kwahic dec, naḡ kôm Anötö ndê yom naḡ sêto yêc, naḡ ḡandô sa.”

⁵⁰ Têḡ dinaḡ Yisu ndê lau hoḡ sêhu inḡ siḡ ma sêlhö si.

⁵¹ Ngac batac daḡ kêkuc Yisu ma mbo whiḡ inḡ ti ndê lau têḡ ôbwêc dinaḡ, ma inḡ puc po ḡambwa. Lau siḡ bu sêlô inḡ dôḡ,

⁵² tigenḡ inḡ hu ndê po siḡ yêc ḡac si amba, ma kölhö ḡamlic ḡambwa gi.

Lau bata Israel-ḡa sêmatôc Yisu

(Mat 26:57-68; Luk 22:54-55, 63-71; Jon 18:12, 13, 19-24)

⁵³ Dabuḡsiga atu-tu Israel-ḡa, ti lau bata ma kêdôhônḡwaga yomsu-ḡa hoḡ sêkac sa sêmbo dabuḡsiga ḡamata-ḡa ndê andu. Ma lau naḡ sêkôc Yisu dôḡ sêwê inḡ sêtêḡ andu dau si.

⁵⁴ Pita kêsêlêḡ kêkuc Yisu mbo ahê, e gi sôc dabuḡsiga ḡamata-ḡa ndê andu ḡatunḡlôm gi. Ma inḡ ndôc sic whiḡ lau siḡ sêyob lôm dabuḡ-ḡa ḡatô ma kêsulu ya.

⁵⁵ Dabuḡsiga atu-tu ma lau bata hoḡ naḡ sêndöc Sanedrin si toḡ, naḡ sêḡsalê yom bu sêḡgôliḡ pi Yisu ma sêkêḡ inḡ sip lau Rom-ḡa amba bu sêndic inḡ ndu. Magoc sêtap yom daḡ sa dom.

⁵⁶ Bu lau daêsam sêtisa bu sêhoc yom tasanḡ asê pi Yisu, magoc ḡac hoḡ si yom so dau.

⁵⁷ Tiḡambu lau ḡatô sêtisa, ma sêkêḡ yom tasanḡ pi inḡ bocdec bu,

⁵⁸ “Yac aḡgô ḡac dau sôm, ‘Lôm dabuḡ naḡ ḡamalac sêkwê sa, naḡ aö oc wasenḡ su. Ma têḡ

bêc titö-nga aö oc wakwê andu wakuc dan sa, nan gitôm andu nan ñamalac sêkwê, nan dom.’ ”

⁵⁹ Magoc ñac tigen-tigen si yom so dau tiyham.

⁶⁰ Goc dabuñsiga ñamata-nga tisa kalhac ñalhu, ma ndac Yisu, “Am ngô yom dê sêngôlin pi am, me? Am bu ô yom, me mba?”

⁶¹ Tigen Yisu gêm dau dôn ma ô yom dom. Goc dabuñsiga dau ndac in tiyham, “Am Mesaya dau, Anötö Atuñgac, me mba?”

⁶² Ma Yisu sôm, “Aêc, aö dauñ dindéc. Ma tiñambu mac oc alic Ñamalac ndê Atu ndöc Anötö Ñaclai Ñadau ndê amba andô-nga, ma sip meñ ndöc dao ñahô.”

⁶³ Têñ ndoc dabuñsiga ñamata-nga ngô yom dinan, nan tac ñandê atu dec kêc dau ndê ñakwê kic ma sôm, “Yac dapônda yom dan tu tangôlin pi in-nga dom.

⁶⁴ Yom nan in sôm pi dau, nan sac sambuc! Mac anğô su, ma mac gauc gêm bocke?” Ma ñac hon sêsôm pitigen bu in mbac ndu.

⁶⁵ Lau ñatô sêhu gasôp pi in. Ñac sêkic in tandô ahuc ña po, goc sêtap in ma sêsôm, “Am bu propet, nan sôm asê bu asa gic am.” Ma lau sin-nga sêkôc in sêsa si, ma sêhi in ña sö.

Pita sêc Yisu ahuc

(Mat 26:69-75; Luk 22:54-62; Jon 18:15-18, 25-27)

⁶⁶ Têñ têm dinan Pita mbo andu dau ñamakê, ma dabuñsiga ñamata-nga ndê awhê akin dan kêsêlêñ meñ.

⁶⁷ In gêlic Pita kêsulu ya mbo, goc tahê in ma sôm, “Am ngac nan kêkuc Yisu Nasaret-nga whin.”

⁶⁸ Magoc Pita pa dau ma sôm, “Mba, aö kayalê am nem yom ñahu dom.” Dec in tisa gi kalhac kêpin tunlôm ñagatam.

⁶⁹ Malô goc awê akin dau gêlic in tiyham, ma sôm yom kain tigen têt lau nan sêlhac sêmpin, “Alic ñgac kêlê. In Yisu ndê lau si dan.”

⁷⁰ Magoc Pita pa dau tiyham. Ñasawa saun ma lau nan sêlhac dindê, nan sêsôm, “Am ñgac Galili-nga. Yomandô, am ñac si dan.”

⁷¹ Magoc Pita sôm ti ñanga, “Mba! Aö bu wasôm yom tasan, nan goc Anötö ndic aö. Aö kayalê ñgac nan mac asôm yom pi in, nan dom andô!”

⁷² Ma ñagahô dalec tan tilu-nga, dec Pita gauc gêm Yisu ndê yom bu in oc sêc in ahuc tidim tö su, goc dalec oc tan tidim lu-nga. Ma in tan dau ndu-ndu.

15

Pailot kêsü Yisu

(Mat 27:11-26; Luk 23:2-3, 18-25; Jon 18:29-19:16)

¹ Têt bêtêc ganduc, dabuñsiga atu-tu ti lau bata ma lau nan sêndôhôn yomsu ti lau †Sanedrin-nga hon si ñalôm tigen tu gêt bocke bu sêkôm têt Yisu-nga. Goc sêsô in amba dôn ma sêwê in sêtêt Pailot si.

² Ma Pailot ndac in, “Am lau Israel-nga si kin, a?” Goc Yisu ô yom ma sôm, “Tôm nan am daôm sôm.”

³ Têt dinan dabuñsiga atu-tu sêngôlin yom daêsam pi in.

⁴ Dec Pailot ndac in tiyham, “Am oc ô ñac si yom, me mba? Ñac sêngôlin yom daêsam pi am.”

⁵ Tigen Yisu ô yom dom, dec Pailot hêdaê.

6-7 Têñ tēm dinan̄ ñgac dan̄ ndöc gapocwalô, nan̄ ndê ñaê Barabas. Mun̄-ñga lau ñatô sêli dau sa têt̄ñ lau Rom-ñga nan̄ sem gölin̄ lau Israel-ñga, ma sic lau ñatô ndu. Magoc lau Rom-ñga sêkôc ñac dôn̄ ma sêkên̄ ñac sêndöc gapocwalô. Ma Barabas in̄ ñac si dan̄.

Tôm yala hon̄ têt̄ñ ndoc lau Israel-ñga si om atu Mwasin̄ Pasowa-ñga hôc asê, nan̄ Pailot kêkuc lêt̄ñ dan̄ bocdec bu. Lau Israel-ñga oc sêndac ñgac gapocwalô-ñga dan̄, dec in̄ oc êñgapwêc in̄ su têt̄ñ ñac.

8 Lau daêsam nan̄ sêkac dau sa têt̄ñ ndoc Pailot kêsahê Yisu, nan̄ sêndac in̄ bu êñgapwêc ñgac gapocwalô-ñga dan̄ su êñkuc ñagôlin̄ dinan̄.

9-10 Pailot kêyalê bu dabun̄siga atu-tu sem lêmun̄ Yisu ñambwa, ma tu dinan̄-ñga dec sêwê Yisu sêtêt̄ñ in̄ sêmen̄. Bocdinan̄ in̄ gauc gêm bu êñgapwêc Yisu su, dec ndac ñac, “Mac atac whin̄ bu aô wahu Kin̄ Israel-ñga sin̄ têt̄ñ mac, me mba?”

11 Tigen̄ dabun̄siga atu-tu sêñgalôm lau ton̄ atu dinan̄ e sêndac Pailot bu hu Barabas sin̄ têt̄ñ ñac.

12 Goc Pailot ndac ñac, “Bocdinan̄ aô oc wakôm sake têt̄ñ ñgac dindec, nan̄ mac asam bu lau Israel-ñga si Kin̄?”

13 Ma sêmbwêc, “Ndic in̄ pi a gicso dau!”

14 Magoc Pailot ndac ñac, “Tu sake-ñga? In̄ kôm giso bocke?” Magoc sêmbwêc ti ñanga, “Ndic in̄ pi a!”

15 P ailot bu kôm lau atac ñayham sa, dec gölôc bu êñgapwêc Barabas su têt̄ñ ñac. Ma in̄ kêkin̄ Yisu têt̄ñ lau sin̄-ñga bu sêhi in̄ ña sö, ma sêndic in̄ ndu pi a gicso dau.

*Lau siŋ-ŋga sêsu Yisu susu
(Mat 27:27-31; Jon 19:2-3)*

¹⁶ Lau siŋ-ŋga sêwê Yisu sêsa Pailot ndê andu ŋamalacôm si, ma sêta yom bu lau siŋ-ŋga hon sêkac sa.

¹⁷ Goc sêkêŋ Yisu sôc ŋakwê kokoc baliŋ tôm kiŋ sêsôc, ma sêwhê wac kêm ma sêkêŋ iŋ uŋ gitôm sunsuŋ.

¹⁸ Goc ŋac sic hu sêmbwêc iŋ, “Ei! Datoc lau Israel-ŋga si kiŋ dindéc sa maŋ!”

¹⁹ Ma ŋac sêkôc a daŋ ma sic iŋ pi ŋagôlôn tidim daêsam, ma sêhê gasôp pi iŋ. Sêpôn haduc têŋ iŋ, ma sêŋsau bu sêtoc iŋ sa.

²⁰ Sêsu iŋ susu pacndê, goc sêkôc ŋakwê baliŋ dinaŋ su, ma sêkêŋ iŋ sôc dau ndê ŋakwê sa tiyham. Ma sêwê iŋ sêsa malac Jerusalem ŋamakê si, bu sêndic iŋ ndu pi a gicso dau.

*Sic Yisu pi a gicso dau
(Mat 27:32-44; Luk 23:26-43; Jon 19:17-27)*

²¹ Lau siŋ-ŋga sêwê Yisu sêmbo seŋ, ma ŋac daŋ kêsêlêŋ mbo seŋ akêŋ gameŋ ŋamakê-ŋga meŋ. Ma sêkac iŋ bu hôc Yisu ndê a gicso dau. Ngac dau ndê ŋaê Saimon. Iŋ Aleksanda lu Rupas damba, ma iŋ ndê malachu Sairin.

²² Sêwê Yisu sêsa si e sêhôt asê gameŋ naŋ sêsam bu Golgota. (Ŋaê dau danem kwi bu ‘Gameŋ Ŋakêcyha-ŋga.’)

²³ Lau siŋ-ŋga bu sêkêŋ wain ti bu ŋamakic têŋ Yisu nôm, magoc iŋ tec.

²⁴ Bocdinaŋ sêhu siŋ, ma sic iŋ pi a gicso dau. Ma tiŋambu sêwhê iŋ ndê ŋakwê kôc ma sêpuc gapoc bu sêlic asa oc kôc ŋakwê bocke.

25 Nac sic inj pi a gicso têtj bêbêc, acgatu gitôm 9 kilok.

26 Ma yom nanj lau bata Israel-nga sêngôlinj pi inj, nanj sêto pi bapia danj, nanj sôm, “Lau Israel-nga si Kinj.”

27-28 Nac sic ngac sac lu pi a gicso dau sêwhinj, danj kêgalênj Yisu amba andô-nga, ma danj kêgalênj gasê-nga.

29 Lau nanj sênsêlênj si sêmenj, nanj sêndahinj njasu ma sêtanj bôlê Yisu. Sêsôm, “Ei. Am ngac nanj sôm bu senj lôm dabunj su ma kwê sa tiyham tôm bêc tō.

30 Dec sip akênj a gicso dau mwenj, ma nem daôm sa!”

31 Ma dabunjsiga atu-tu ti kêdôhônjwaga yomsu-nga bocdinanj sêsu inj susu ma sêsôm têtj dandi, “Inj gêm lau daêsam sa, tigenj gitôm dom bu nem dau sa.

32 Yac bu alic Mesaya, lau Israel si kinj dindec-nga, sip akênj a gicso dau menj, dec yac oc akênj whinj inj.” Ma ngac lu nanj sic pi a gicso sêwhinj Yisu, nanj sêsu inj susu bocdinanj.

Yisu mbac ndu

(Mat 27:45-56; Luk 23:44-49; Jon 19:28-30)

33 Têtj ac kalhac lhu, njasec atu gêm gamenj sambuc ahuc e acgatu gitôm 3 kilok telha-nga.

34 Ma têtj 3 kilok Yisu mbwêc awha atu, “Eloi, Eloi, lama sabaktani?” (Yom dau danem kwi bu, ‘Aö nenj Anötö, aö nenj Anötö, tu sake-nga am hu aö sinj?’)

35 Lau nanj sêlhac sêmpinj, nanj sêngô inj njapep dom ma sêsôm, “Angô, inj ta propet Elaija.”

36 Ma ngac danj kêtî gi kênj sôwam danj sip wain njamakic, ma sô dônj pi a balinj danj. Goc inj puc pi

Yisu whasuj bu inj nôm ma sôm, “Dahu inj siŋ ma dalic, Elaija oc sip meŋ ma kôc inj su, me mba.”

³⁷ Têŋ têt dinanŋ Yisu mbwêc awha atu ma mbac ndu.

³⁸ Ma têt dinanŋ po baliŋ nanŋ kêgalêŋ lôm dabunŋ ɲalôm, nanŋ dau kic gi lu, kalhac ɲahô ma gi têt ɲapu-ɲga.

³⁹ Ma ɲgac bata siŋ-ɲga nanŋ kalhac Yisu aŋgô-ɲga, nanŋ gêlic inj ndê mbac ndu ɲalêŋ, goc sôm, “Yomandô, ɲgac dindéc inj Anötö ndê Atu.”

⁴⁰ Lauwhê ɲatô sêlhac ahê ma sêlic gêŋ honŋ dinanŋ. Maria Magadala lu Maria nanŋ Jems sauŋ lu Joses dinda, ma Salome sêmbo sêwhiŋ ɲac.

⁴¹ Muŋ-ɲga, têt têt Yisu mbo gameŋ Galili-ɲga, nanŋ lauwhê dinanŋ sêŋkuc inj, ma sem akiŋ inj. Ma lauwhê daêsam nanŋ sêpi Jerusalem sêwhiŋ Yisu, nanŋ sêlhac sêwhiŋ ɲac.

*Josep kêŋ Yisu ndê ɲamlanŋ yêc hoc ɲasuj
(Mat 27:57-61; Luk 23:50-56; Jon 19:38-42)*

⁴² Bêc nanŋ sic Yisu ndu, nanŋ lau Israel-ɲga si bêc sêmasanŋ dau tu Sabat-ɲga.* Bocdinanŋ têt telha,

⁴³ ɲgac bata Israel-ɲga danŋ ɲaê Josep gauc gêm bu êŋsuhunŋ Yisu ɲamlanŋ. Josep inj ɲgac akêŋ malac Arimatiya-ɲga, ma inj lau Sanedrin-ɲga si ɲgac ti-waê danŋ nanŋ kêŋ bata Anötö ndê gôliŋ bu meŋ sa tiawê. Inj ndê ɲalôm pêŋ dôŋ, dec têt Pailot gi ma ndac Yisu ndê ɲamlanŋ.

* **15:42:** Lau Israel sêsôm bu têt ndoc ac gi sip têt bêc nanŋ muŋ bêc Sabat-ɲga, nanŋ têt dau gic hu bêc Sabat-ɲga. Bocdinanŋ ɲac bu sêŋsuhunŋ lau batê muŋ ac ndi sip.

⁴⁴ Yom dau kôm Pailot sö, ñahu bu in kÿyalê dom bu Yisu mbac ndu su. Bocdinañ in ta lau siñ si ñgac bata ma ndac in bu Yisu mbac ndu su, me mba.

⁴⁵ In tap sa bu Yisu mbac ndu su, dec gôlôc tÿñ Josep bu kôc Yisu ndê ñamlañ sa ndi êñsuhuñ.

⁴⁶ Josep kôc po ñayham dañ nañ in gêmli muñ su, goc sa gi ma kôc Yisu su yêc a gicso dau, ma kêpañ in ahuc ña po dau. Ma in kôc in sa gi ma kêñ in yêc sêhò nañ lau sêlêñ gwanañ su yêc hoc ñalôm. Goc in kêpi hoc dañ gi ndôc sê awha dau ahuc.

⁴⁷ Maria Magadala lu Joses dinda Maria sêlic Josep kêñ Yisu ndê ñamlañ yêc hocsuñ dinañ.

16

Yisu tisa

(Mat 28:1-10; Luk 24:1-12)

¹ Bêc Sabat-ña meñ gi su, goc Maria Magadala lu Jems dinda Maria, ma Salome semlihi gÿñ malu bu sênem oso Yisu ndê ñamlañ.

² Tÿñ wake ñabêc ñamata-ña dinañ sêti tÿñ bÿbêc ganduc bu sêtÿñ sêhò sêndi. Ac pi meñ su ma sÿñsêlêñ sêmbo señ,

³ ma sêndac dandi, “Asa oc nem yac sa ma êmpi hoc nañ yêc sê awha, nañ su?”

⁴ Tigen sêhòc tandô sa, ma sêlic hoc atu dau yêc sê awha dom.

⁵ Bocdinañ dec sêsôc sêhò ñalôm si. Sêlic ñgac batac dañ nañ sôc ñakwê sêsêp, ma ndôc andô-ña, dec sêsô ñandô.

⁶ Magoc ñgac dau sôm, “Asô dom. Mac añsalê Yisu Nasaret-ña, nañ sic in ndu pi a gicso dau. In yêc dec dom, in tisa su. Alic mala nañ sêkêñ in yêc, nañ sawa.

7 Magoc andi ma asôm têtj inj ndê sêñomi ma têtj Pita bu inj oc muñ mac têtj Galili ndi. Mac oc alic inj yêc dindê, tòm yom nanj inj sôm têtj mac muñ su nanj.”

8 Yom dinanj kôm awhê lu dau sêntitec ti sêhêdaê ñandô. Sêsa akêñ sêhô, ma sêlhô sênti si. Magoc sêtöc dau dec sêsôm yom têtj ñamalac danj yêc senj dom.

9 Têtj têtj Yisu tisa têtj Sonda bêbêc, inj hoc dau asê ti-ñamata-ñga têtj Maria Magadala, awhê nanj muñ-ñga inj soc ñalau sac 7 su yêc inj ñalôm.

10 Ma Maria gi ma sôm asê têtj lau nanj sêñkuc Yisu, nanj sêkôm danjibo ti sêtanj sêmbo.

11 Maria sôm têtj ñac bu inj gêlic Yisu ma inj mbo tali tiyham. Magoc ñac sêkêñ whinj dom.

12 Tiñambu Yisu ndê ñgac-sêñom lu sêhu Jerusalem sinj ma sêñsêlêñ sêmbo senj, ma Yisu hoc dau asê têtj injlu gitôm ñgac anjô batac danj.

13 Dec injlu sêmbu si ma sic minj têtj sêñomi ñatô, magoc ñac sêkêñ whinj injlu dom bocdinanj.

Yisu kêtj gwelenj têtj lau nanj sêñkuc inj

14 Tiñambu ñgacsêñomi 11 senj gêñ sêmbo sêwhinj dau, ma Yisu hoc dau asê têtj ñac. Ma inj sôm ñac tu ñac si ñalôm ñadandi-ñga, bu sêkêñ whinj lau nanj sêlic inj têtj ndoc inj tisa su, nanj dom.

15 Goc inj sôm têtj ñac, “Atôm nom ñagamenj sambob andi, ma ahoc ñawaê ñayham asê têtj lau honj.

16 Lau nanj sêkêñ whinj ma sêlinj sanju, nanj oc sêtap Anötö ndê mwasiñ nem ñac si-ñga sa. Magoc lau nanj sêkêñ whinj dom, nanj oc sêtap inj ndê matôc sa.

¹⁷ Ma Anötö oc kên ñaclai têt ñau nañ sêkêt whiñ, dec oc tòm bu sêkôm gêt dalô bocdec bu. Ñac oc sêkôm gwelen sênem aô añôñ, ma sêsoc ñalau sac su yêc lau. Ñac oc sêsôm yom awha wakuc-ñga nañ sêndôhêt muñ su dom.

¹⁸ Ñac bu sêkôt mboc sac sip ñac amba me sênôm bu ñamalic, dec oc kôm ñac sêtisac dom. Ma ñac oc sêkêt amba sac lau gêm bac, ma sêkôm ñac ñayham sa.”

¹⁹ Yisu sôm yom dinañ têt ñac su, goc Anötö kôt iñ su yêc nom. Iñ pi undambê gi, ma ndöc Anötö ndê amba andô-ñga.

²⁰ Ma iñ ndê sêñomi sêsa si, ma sêhoc ñawaê ñayham asê yêc gameñ hoñ. Ma Pômdau mbo whiñ ñac, ma kên ñaclai têt ñac bu sêkôm gêt dalô atu-tu tu bu puc yom nañ sêhoc asê, nañ dôt-ñga.

Anötö ndê Yom Lêṛsêṃ Wakuc
The New Testament in the Bukawa language of Papua
New Guinea

Nupela Testamen long tokples Bukawa long Niugini

copyright © 2000 Lutheran Bible Translators Australia

Language: Bukawa

Translation by: Lutheran Bible Translators Australia

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 18 Apr 2025 from source files dated 31 Aug 2023

545e5ca3-1e95-59e4-8380-93951e023cf7